

萬國史綱目

壹

000152-001-4

116-190

万国史綱目

重野 安繹 / 著

和 1 冊

M35

ACA-0227



成齋重野先生著

萬國史綱目

岸吟香題



明治壬寅初夏  
東京勸學會刻

翻刻必究

萬國史綱目序

馮


天地剖判日月始明萬國斯立  
狂獠成羣蓋幾千萬年矣世  
有治亂興廢人有賢愚邪正政  
治文學以藝技術日趨旺盛而  
國各有史焉莫不晰其本末而

萬國史綱目序

印



天地剖判日月始明萬國斯立  
狂獠成羣蓋幾千萬年矣世  
有治亂興廢人有賢愚邪正政  
治文學以藝技術日趨旺盛而  
國各有史焉莫不晰其本末而



明其澆替也。然其為書浩瀚，惟  
海深遠如山。不知學者何以究之。  
且史不患不詳，而患不公。不病不  
華，不病不實。蓋尊內卑外，夸  
張自大，自古而然。作史者不其  
難乎。此書統括萬國而攬其要，  
通覽千載而約其旨。取舍適  
宜，詳畧有法。公而無私，實而不  
華。綱舉目張，讀瞭然。全世界之  
事盡於此矣。若知其詳，則從  
流究原，自卑登高，所謂山海之浩  
深，亦因可以窺也。此為序。

明治三十五年四月

副島種臣撰



金井之巷書



凡例

一此書起于埃及建國訖于普法戰爭泰西諸國埃及最古近世戰爭普法最大故託終始於此

一此書年曆殆五千年五洲邦土縱橫數萬里其間疆域形勢盛衰興廢紛紜錯綜難于彙括今據邦文所譯泰西史策湊合成編亦唯約略領其本末而已

一年經事緯大書以提綱分注以備目紫陽綱目例為然此書綱目皆大書但目低一字

一凡分目有追原其始者有遂言其終者有事非一時而牽連相及者若其異說可以資考者或更須詮釋者則用小字分註

一紀元年號以我邦為綱分注漢土年號及西曆以便彼此對照但無事則不備歲年

一此書專詳歐美各國事蹟，若我邦及漢土朝鮮，各有史籍，無煩紀述，故止舉其歷代及大事，餘從簡省。

一各國稱帝稱王，帝書崩，王書殂，皆隨其事實而書之，非敢加褒貶於其間。若越南漢史常以封王書，然其在本國自稱帝號，大越史記既有明文，今從之。羅馬法王用皇字，以別於法蘭西王。

一各國地名人，譯音無定字，言人人殊。蓋泰西有兩字合音三字合音，而漢土無此種字，故以漢字書西語，不脗合者頗多，今概從徐繼畲瀛環志略及近人翻譯諸書，地名施複線，人名施單線。

一地名人名左旁施邦文者，便邦人覽閱。  
一各國語音本不相同，此書所據譯本，如英法德義原語各異，故有或不免混淆者，今一從譯本，不問其孰為正音也。

一書中距離，用我邦里數。漢土一里約我邦一里之七分一強。清里以我一里除之，得一四六零七。

英美一哩約我邦一里之二分一半弱。英哩以我一里除之，得四零九七七。

一此書自我神武帝紀元前二千餘年前，支那三皇之時，西曆紀元前三千餘年。至建久二年辛亥，紀元一千八百五十二年，宋光緒二十八年，西曆千八百九十二年。

四卷為上編，自建久三年壬子，紀元一千八百五十二年，宋光緒二十八年，西曆千八百九十二年。至明治四年辛未，紀元二千五百三十一年，清同治十年，西曆千八百七十一年。四卷為下編。

二

萬國史綱目上編

目次

卷之一

起我神武帝紀元前二千餘年支那三皇之時○西曆紀元前三千餘年 訖孝安帝七十年戊戌紀元三百三十八年○周顯王四十六年○西曆前三百二十三年 凡二千三百餘年

卷之二

起孝安帝七十一年己亥紀元三百三十九年○周顯王四十七年○西曆前三百二十二年 訖成務帝六十年庚午紀元八百五十年○漢獻帝初平元年○西曆百九十年 凡五百十二年

卷之三

起仲哀帝元年壬申紀元八百五十二年○漢獻帝初平三年○西曆百九十二年 訖桓武帝延曆十二年癸酉紀元千四百五十三年○唐德宗貞元九年○西曆七百九十三年 凡六百二年

卷之四



起桓武帝延曆十三年甲戌

紀元千四百五十四年○唐德宗貞元十年○西曆七百九十四年

訖後鳥羽帝建久二

年辛亥

紀元千八百五十一年○宋光宗紹熙二年○西曆千八百九十一年

凡三百九十八年

萬國史綱目卷之一

日本 重野安繹著

我神武帝紀元前

紀元前三千餘年

埃及建國

埃及在亞弗利州

之東北境北臨地中海東臨紅海東北一隅與亞細亞

洲接西南連沙漠各二百四十餘里

○里數從我國制詳見凡例

分爲上中下三土上

中兩土臨紅海山嶺對峙綿亙如夾巷下土臨地中海坦潤膏腴支河滌絡

爲嘉壤中有大水貫流曰尼羅河有二源出於洲中大湖及亞比西尼亞山

中經山嶽湖沼犀象鱷蛇所棲息至平野二水相會爲大河北流入埃及岐

數支注地中海長凡一千餘里此河至夏秋交冰雪融解漲溢培養兩岸皆

爲良田近河之地狹凡四里廣不過八里至當達始平潤河水不至之處盡

係荒沙年之豐歉視水爲度地少陰雨沙漠炎熇有綿斯者或云系出於諾

亞來建國於此都門非斯門非斯在中土沿尼羅河西岸綿斯始教民以稼

稽設官職造文字講武備修法度隣近諸部翼戴之時歐羅巴草昧未開埃及獨顯西土之文物皆其所創也其民族蓋徙自亞細亞者國王之下階級有四僧侶為上次武士次商工次農牧宗教以崇拜太陽為主又有他神習俗人死以香油敷其屍使永不朽最巧築造至第四朝哈布羅門哈羅諸王時在四層前二千七八百年築先王陵墓磊巨石為尖塔狀如金字故即名金字塔

前一千七百四十年高辛氏末世四層前二千四百年德巴斯人治埃及

埃及分裂德巴斯部最强德巴斯在上埃及遂統一全國王亞美內摩窩西爾達時國勢大張畧尼羅河上游地至亞美內摩第三在我紀元前一千五百四十年夏曆時四層前二千二百年鑿美黎湖修尼羅河又造螺旋旋堂有十二殿三百餘室建金字塔亦最多大者基潤百二十餘步頂銳高凡四百八十尺堆疊而成四面正方以花剛石砌成石上鐫刻古篆文螭斗離奇體勢瑰異前後所造數十基門非斯近地今猶歸然獨存

前一千六百九十七年四層前二千三百五十六年唐堯即帝位

號陶唐氏都平陽作曆象以授民時

前一千五百九十五年四層前二千二百六十六年虞舜即帝位

號有虞氏都蒲坂

前一千五百四十五年四層前二千二百零五年夏大禹即帝位

國號夏都安邑

前一千四百四十年安促基夏時四層前二千一百一十年牧酋取埃及

亞細亞西隅有游牧民其酋來侵埃及遂取之使土人領上埃及

前一千三百四十年夏后芒時四層前二千巴比倫建國

阿付臘底斯底格里士兩大河發源於亞爾美尼高原東南流合入波斯灣兩河間上曰美索不達迷亞下曰巴比倫其地古有闕加獨西迷爾二族我紀元前一千八百四十年高辛氏時四層前二千五百年之際巴比倫人北侵略之後屬東隣

挨蘭國至是建爲王國，首府又曰巴比倫，在阿付臘底斯河西，文用楔字。謂繪畫漸變成文者。

猶太建國

希伯來族，又曰以色列族，居美索不達迷亞，有亞伯拉罕者，爲酋長，率其全族徙地中海東濱，業遊牧，亞伯拉罕娶撒拉，生以撒，嗣其地曰猶太，又巴勒斯坦，又迦南。低地之義。北接叙利亞，東南連阿剌伯，西臨地中海，北有腓尼西亞，南有非利士，西南大澤曰死海，其水鹹惡。

腓尼西亞建國

腓尼西亞亦稱迦南，在黎巴嫩山西，臨地中海，多良港，而其地狹隘，南北六十七里許，東西二里，或六里，國王之下，有元老，每參顧問，上古以捕魚爲業，後製船舶，卒興貿易之業，國民夙巧工藝，熟於礦冶建築組織之技，玻璃及紫彩皆其所創造，又始製聲音文字，行商結隊，廣事交通，南自大馬士革，東

至阿付臘底斯河邊，往來貿易，巴比倫之趨開明，與有力焉，宗教又崇拜太陽。

馬太及波斯大夏建國

巴比倫之東，雪山山脈之西，裏海之南，印度洋之北，一帶之地，稱伊蘭高原，其西北境曰馬太，南境曰波斯，東北境曰大夏。又曰波克其間又有數小部，共阿里亞民族也，宗教崇自然力，有日月火風等各種神。

印度建國

喜馬拉山脈之南，有廣土，突入南海，形如箕舌，曰印度。漢書謂之身毒，又稱天竺。有二大流，夾之入海，東曰安額河。佛書所謂恒河也。西曰信度河，中間數百里，悉屬高原，西北有沙磧，餘多沃壤，氣候迥殊，迤北則涼燠咸宜，迤南則炎熇殊甚，土宜五穀棉花，產寶玉、瑪瑙、藥材、香木、林叢蒼翳，禽獸蕃衍，信度之域，曰本若，若阿里亞族侵入居之，爲數部落，民概業農牧，以金鐵造軍器，又飾宮室，製金貨，以營商。

萬國史綱目 卷之十一 三 劫

業、宗教率同伊蘭。按傳云、印度上古有日種月種二族爭鬪事、然近傳奇、今不取。

前一千二百四十年。夏后歷時、四曆、前一千九百年。巴比倫人始建亞西里亞國。

巴比倫人有徙北方者、創尼尼微府、稱亞西里亞王國、屢與本國爭、然猶不

免羈屬、四方仍稱巴比倫、亞西里亞南接巴比倫、西隣美索不達迷亞、東連

馬太北帶亞爾美尼山脈、尼尼微府在底格里士河西、巴比倫亞西里亞共

齊密土族、宗教崇敬天體、以太陽為主神、又有軍神、愛生女神等、民族長曆

數、勤農業、又精組織彫刻之技、海陸通印度及中央亞細亞、以懋遷有無。

說云、上古有尼魯者、與其妃西迷拉、美斯達亞西里亞國、征服四隣、尼魯城、巴比倫城、皆其所造、西迷拉、美斯、又大興印度、戰皆係希臘人所作、傳奇、今不取。

前一千一百六十六年。西曆前一千七百六十五年。商湯王即位。

國號商、都亳、改歲曰祀。

前一千四十年。商沃丁二十一年、西曆前一千六百七十年。德巴斯人復埃及。

先是。西曆前一千八百八十年。德巴斯人舉兵抗牧王、至是其酋亞摩斯遂逐牧王、復埃及。

自為其王、國勢頗隆、至王突德摩斯第三、遷都德巴斯。西曆一千六百六十二年即位。

前八百九十五年。商仲丁八年、西曆前一千五百五十六年。灑哥落建雅典國。

希臘國、又曰伯萊斯、歐羅巴南境半島也、東臨多島海、西臨以阿尼海、港灣

繚環、洲嶼星列、國中巒巒迴隔、自為區分、群峰競秀、名勝甲於西土、分為四

部、其最南一大嶼曰伯羅奔尼撒、中央曰中部希臘、北有二部、東曰德沙利

西曰耶卑路、其北境伯萊斯日族住之、後阿里亞族來居焉、沿海則腓尼西

亞國移民闢之、初迦南人有義納孤者、來其南境亞義斯、始教土人以構屋

耕田、至此灑哥落又從埃及灑的斯、率其邑人來亞的、加立國曰雅典、始興

技業、立法制、教禮儀、造文字、織羊毛為衣、釀葡萄為酒、取橄欖為油、鑄金鍛

鐵、作刀刃耒耜、歐羅巴之開、淳悶通文學、實自希臘始、尋腓尼西亞人加達

慕建德巴府、埃及人大腦士至亞義斯、呂底亞人伯羅布至伯羅奔尼撒

前八百九十年。商外壬元年、西曆一千五百五十年。猶太約色弗率族徙埃及。

猶太曾以撒生耶哥伯，又稱以色列，繼父祖業，治猶太然，四方皆為異教徒，往々不安。耶哥伯生十二子，第七子曰約色弗，承業，乃率全族徙埃及，珂山居尼羅河口百路修地。

腓尼西亞建西頓府

腓尼西亞為商賈之國，貿遷有無，居積財貨，以此致富，益治舟楫，移民於各地，專力拓殖，自居伯羅羅得、克勒達、希達拉及希臘沿海諸島，以至馬里他島、撒丁島、亞弗利加北岸，建城邑，立市廛，墾田野，與廟宇，四方無業之民，群往歸之，隸屬本國，聽其政令，地中海利權歸其掌握，於是建西頓為其首府。

前八百七十四年前一千五百二十四年埃及王亞美奴非斯第三立

亞美奴非斯有雄畧，屢出師外征，攻略四隣，南至依西阿比，東北至阿刺伯，叙里亞、美索不達迷亞，莫不服從，又盛營土木，建宮殿於德巴斯，侈麗無比，在位六十五年，一時之盛，號為中興。

前七百二十八年前一千三百八十八年埃及王拉美塞第二立

埃及王亞美奴非斯之後，西索第一立為第十九朝，殂，拉美塞第二立，號曰西索的黎斯，大興土木，營神廟於數處，又欲鑿運河以通尼羅河於紅海，然叙里亞離叛，失其地。按拉美塞王，雖治政善平，然四出攻伐，王欲統一萬國，率大兵遠征，功名不取，者今

前六百六十二年前一千三百二十年埃及王拉美塞殂，墨尼不太立

前六百六十年前一千三百二十年摩西率以色列族去埃及

時希伯來族在埃及者漸繁衍，且異宗教，墨尼不太忌之，虐使如奴隸，尋圖除之，以色列族有至人曰摩西，生而神異，學識過人，乃率全族去埃及，其族敬日月，拜偶像，而摩西從亞伯拉罕教，獨崇上帝，到西奈阿刺伯西北，稱上帝授以十誡，化導族人，摩西在西奈曠野四十餘年而卒，嘗著五書，曰希伯來經典。

按摩西事蹟，史多怪誕，今不取。

前六百四十年商武丁二十五年，西曆前一千三百亞西里亞國自立。

亞西里亞王曰智格羅斯亞達始脫巴比倫羈縻自立。

前六百九年商武丁五十六年，西曆前一千二百六十九年埃及王拉美塞第三立。

時有諸族來寇者，王擊却之。又征腓尼西亞、叙里亞，然自是紀綱漸弛，依西阿比諸部離叛。

前五百九十七年商祖甲二年，西曆前一千二百五十七年雅典王德修修國政。

德修蓋灑哥落之裔也。亞的加民舊分爲四等：曰貴紳、曰武士、曰諸匠、曰牧人。貴紳多專恣剝民，農工貧乏，國寢弱。德修革之，爲地主、農民、工人三等。汰官司，裁署舍，抑損權豪，加惠農民，以阿尼族仰爲祖宗。又有勇士黑爾古列、鐸利亞族，以爲祖宗。

前五百九十年商祖甲九年，西曆前一千二百五十年約書亞入迦南，復建猶太國。

摩西之徒約書亞承摩西後，在西奈逐水草而至約爾檀河東，遂伐迦南，取之分十二族，各占其地。族長統之，建爲猶太國，不別立國王，置高僧職，承上帝意直行之。摩西兄亞倫家世襲之，然雖以以色列舊族，再還此地，未能全服土人，十二族相鬪爭，且四隣異教之徒交乘之，乃奉神意，置士師使入相，出將士師有功績足紀者，其田耶弗大、參孫等最有名。

前五百六十五年商廢辛元年，西曆前一千二百二十五年德巴內亂。

德巴王耶日剝加達慕之曾孫也，弑其父，妻其母，王死，二子伊的疴克勒、波里尼史兄弟爭位。波里尼史率其黨六將攻德巴，伊的疴克勒與之戰，皆死。伯父克勒恩爲王，後十年，波里尼史黨耶卑古內陷德巴，奉波里尼史子的爾參特勒爲王。

前五百三十三年商太丁二年，西曆前一千一百九十三年斯巴爾達陷多來。

多來在小亞細亞黑勒斯奔之濱，先是其王布利亞，其次子巴利掠斯巴爾達王墨尼勞妃希利那而去，希臘諸國以爲大辱，糾合諸軍，以墨尼勞兄米

西奈王亞伽綿農為將攻多來。至是幾殆十年。用奇計陷之。殺王及其諸子。得希利那而還。按希臘古史若德修里爾古列及德巴之戰。征亞非臘的。討多來。傳奇數行。酒色太過。似多失其實。今舉其大略。

前四百六十二年。西曆前一千一百二十二年。周武王即位。

國號周。都鎬。改祀曰年。大封諸侯。

前四百六十一年。周武王二年。西曆前一千一百二十一年。周封箕子於朝鮮。

前四百四十四年。周成王十二年。西曆前一千一百零四年。希臘種族遷移。

希臘族有亞加亞。以阿尼。鐸利亞。埃阿利四種。亞加亞族。占伯羅奔尼撒半島。以阿尼族。在其北部沿海。及亞的加。埃阿利族。在中央及北部。希臘。鐸利亞族。在阿林皮山中。而為數小國。各有元老十餘人。輔王。開民會於市場。王為之長。雖有都府。非有政權。人民概住丘陵。各治其家。多使奴隸。貨幣用牛。後德沙利族。在耶卑路者。踰賓度山。東徙其土人。則南侵白阿西亞。白阿西亞人或服或散。鐸利亞族。亦為德沙利所逐。徙居埃他山。傍至是黑爾古列。

系亞利。斯得摩等率兵。征服伯羅奔尼撒東南地。亞加亞族。乃轉半島北部。以阿尼族。在其地者。徙與亞的加合。於是鐸利亞族。為米西奈。拉哥尼亞。亞。莪斯。非里西亞。昔西恩。哥林多。麥加羅諸國。又中部希臘。有鐸利斯。埃阿利。族。為亞爾加的亞。依利斯。亞加亞。白阿西亞。佛西亞。東西羅哥黎。埃土利亞。加爾拿尼。及德沙利諸國。以阿尼族。占亞的加。及憂卑亞島。而耶卑路。為壹。黎里人所領。

前四百四十年。周成王十六年。西曆前一千一百零一年。腓尼西亞建士羅府。

腓尼西亞人。益務貿易。遙航遠洋。關達盧西。在西班牙。之加的斯。過日巴拉爾大。海峽。達亞弗利加西岸。及錫島。即今英國。波羅的海沿岸。當時所貿易品料。東洋。黃金寶玉。亞刺伯乳香。埃及麻布。亞弗利加象牙獸皮。希臘陶器。依羅巴鐵。西班牙銀。不列顛錫。北海琥珀等。為多。至是建士羅府代西頓。

前四百三十一年。周成王二十五年。西曆前一千零九十一年。埃及王西蒙特。建新朝。

西蒙特斯遷都於達尼斯在尼羅河下流洲上於是政權移下埃及

前四百零八年周康王十一年，四曆  
前一千零六十八年斯巴爾達侵雅典王哥德落戰死始置統領麥屯任之

當是時鐸利亞族徙伯羅奔尼撒壓服亞加亞族建斯巴爾達爲府在拉哥尼亞州又稱拉塞的蒙推阿利斯得摩子歐里德那伯羅刻黎爲首以共和爲政階級有三首爲貴紳執政權即鐸利亞族占拉哥尼亞沃壤者次爲平民即轉徙種族及亞加亞族服從者負課稅就兵役不得參政權次爲奴隸即捕虜爲貴紳所役至是鐸利亞族最盛來侵雅典其勢甚猛王哥德落知不能克以身殉之以紓國家之難雅典乃置阿爾干統領終身任職以哥德落王系麥屯任之

前三百九十五年周康王二十四年，四曆  
前一千零五十五年猶太王掃羅立

初猶太國置士師統政治及措母耳爲士師德量過人盡力施教然國民欲

別立國王甚切乃一變國體迎掃羅立爲王

前三百六十五年周康王二十八年，四曆  
前一千零二十五年猶太王掃羅自殺太闢代立

掃羅好勇連征服異族然與措母耳不諧於是措母耳密迎猶太族太闢爲王太闢依非利士假其力擊掃羅破之掃羅自殺太闢定都希伯倫君猶太族尋逐埃及人取耶路撒冷徙之修文武政其威力南自紅海東北端東及阿付臘底斯河北陷大馬士革非利士偏居一隅又建王宮神龕興宗教文學猶太以是時爲極盛

前三百四十年周穆王二年，四曆  
前一千零一年大夏人瑣羅斯的始唱新教

當是時大夏國亦盛有至人曰瑣羅斯的始唱新教其教旨謂萬事有正神曰和爾摩有邪神曰亞利慢爲之主宰互爲爭鬪人之死生禍福皆其所爲故人當以祈正神修善行爲要又日月星及大地爲和爾摩所生以殖果穀明火者照闇黑威惡魔之利器清水者脫垢穢淨塵心之要具皆當尤加敬



虔以一變舊教大夏馬太波斯等皆奉之所著有阿白斯多經典

印度分爲數國

阿里亞族既入印度漸進至安額河畔又南沿海岸遂及錫蘭島分爲數小王國征服土人賤視之如惡鬼號曰羅刹於是分尊卑有四種階級第一僧侶曰婆羅門第二武士曰刹帝利第三平民曰毘舍第四賤民曰首陀首陀即土人不得禮神宗教又變爲婆羅門教以爲神亦具人體居天上別有境界其著者曰梵天帝釋祭儀極嚴而其所教言世界唯幻影耳人在其間不可不解脫死生流轉之境韋陀經典以梵語編之僧侶口誦相傳後至文學漸開猶尊口授其他曆數醫學亦多所闡發

前三百三十三年周穆王九年西曆前九百九十三年猶太王撒門立

撒門太闢之孫也受禪即位時腓尼西亞王希蘭有賢名與撒門交厚相謀擴張貿易從紅海航達印度洋希蘭又建市於小島曰新士羅築隄以接陸地撒門則役士羅人建上帝神堂於耶路撒冷營王宮極侈麗又設置軍隊建太特母耳市於叙里亞沙漠功業頗有可觀然晚年容異教許拜偶像流驕淫政多壓抑至廢族長遂成內亂之端

前三百零一年周穆王四十一年西曆前九百六十一年埃及侵猶太

埃及王西薩立爲第二十二朝是年侵猶太入耶路撒冷多所虜掠

前二百九十三年周穆王四十九年西曆前九百五十三年猶太分爲以色列國

及猶太王撒門殂子羅破暗嗣位各族長勸除苛政不聽北部十族離叛奉耶羅破暗爲王國號以色列建首府於撒馬里亞羅破暗率猶太及便雅閔二族猶治耶路撒冷稱猶太王於是干戈相尋爭鬪不絕

前二百五十七年周穆王五十八年西曆前九百一十七年依都巴爾篡腓尼西亞王位

依都巴爾爲阿斯太特神掌破環戰爭宮高僧至是殺希蘭王裔自立爲腓尼西亞王

前二百四十年

周孝王十年，四曆前九百年。

希臘人拓地於小亞細亞。

小亞細亞在亞細亞洲極西，爲半島，北臨黑海，隔黑勒斯奔海峽，對歐羅巴，西瀕多島海，南沿地中海，東接亞爾美尼亞，其地南北峻巖嵯峨，叢林遍嶺，東南高原深谷，多爲游牧之所，中多腴壤，產穀麥，五金，蠶絲，酒，蜜，香藥之屬，爲數小部，北有奔多，巴弗拉，義尼，庇雅尼，南有基利家，希西底亞，呂家，中央有伽帕多家，弗呂家，西有美西亞，呂底亞，加里亞，宗教同齊密土族，崇拜太陽，而呂底亞最著，首府曰撒狄，法母斯河貫流之初，希臘國鐸利亞族等，驅逐土人，土人東遷居海島及呂底亞海濱，既而諸種族亦移民拓地，至是埃阿利及亞加亞族，領呂底亞，北美西亞沿岸，列斯保島，以阿尼族自加拉的群島，至小亞細亞屬島比阿西，撒母斯，又建十二市於呂底亞沿岸，美列市最爲重要，遂及西拉幾亞，馬基頓，鐸利亞族，占加里亞海濱，及其群島，據羅得島，漸斥逐腓尼西亞人，遂又拓亞非利加北岸，至義大利南部，西治里島。

西班牙海濱，而諸族各設政府於其地，施共和政，唇齒相依，互相親密，以當外族，於是海上之權，概歸希臘。

前二百二十三年

周夷王十二年，四曆前八百八十三年。

亞西里亞王亞斯爾拿西巴耳立。

亞斯爾拿西巴耳出兵四隣，征馬太波斯爲附庸，又屢侵腓尼西亞。

前一百九十年

周厲王二十九年，四曆前八百五十年。

腓尼西亞建加爾達額市於亞非利加。

先是腓尼西亞王依都巴爾殂，傳位至其孫，其孫臨死，遺命少子不格摩里溫及其女約律撒，或說謂直譯使伯父僧西巴爾拔耳輔之，不格摩里溫已長，殺西

巴爾拔耳，亂又起，遂約律撒，且亞西里亞人屢來侵，於是舊族等奉約律撒去，士羅到亞非利加北岸，擇地建加爾達額市，推兩統領元老各二人，共和爲政，其地北出，接突尼斯岬，西有烏地加，港灣交錯，爲最要地，於是士羅衰微，不復能觀舊時盛況。

前一百八十三年

周厲王三十六年，四曆前八百四十三年。

以色列國人依里撒等滅王族，立歐爲王。

猶太王妃亞大利擅權害王族。

初以色列王亞哈以其妃約沙法爲士羅人奉腓尼西亞異教崇拜偶像其教竟延及國中於是神教徒依里約依里撒等不服推將軍歐爲王殺王妃夷滅亞哈王族嚴禁異教先是猶太王阿沙法欲與以色列和爲太子約藍迎亞哈王女亞大利爲夫人即約沙法所生也後約藍立以前年卒於是王妃亞大利擅權欲絕太關系統盡害諸孫布異教於耶路撒冷。

前一百七十七年

周共和五年四曆前八百三十七年

約雅達殺猶太王妃立王烏亞西

烏亞西約藍之孫也亞大利之殺諸孫烏亞西獨免被養於神廟至是高僧約雅達廢亞大利殺之迎烏亞西立爲猶太王即廢異教。

前一百六十年

周宣王八年四曆前八百二十年

斯巴爾達人利古爾厄定共和憲法

利古爾厄王族也爲人方正爲少主哈利拉呵攝政斯巴爾達國民有三級至是利古爾厄因之新立憲法其法國有二王一爲歐里德那系一爲伯羅

刻黎系二王選任監督官五人謂之以訶利以糾諸官違法者雖國王必按律罰之設元老議會及民會元老選年六十以上有賢才者二十八員隸二王草議案判大罪民會舉貴紳年三十以上者裁決議案元老待民會議決以施行之憂貧富不均制均田法貴紳均任財產軍旅二事其家邑世襲之不許沽賣耕耘一委於奴隸貨幣用鐵錢金銀則國家特有之男兒至七歲受公共教育至成人起臥兵營專習武事二十歲任守衛又有編奴隸爲守衛者時貴紳凡四千五百人後至九千平民有三萬人云。

前一百十六年

周幽王五年四曆前七百七十六年

希臘始行阿林皮四年大祭

初希臘宗教謂混沌溟滓天地剖判化生巨神及陰陽二神生天神及其諸弟海神統御宇內地獄神治下界謂之阿林皮諸神又有牧神野神水神等而天神等十二神爲在阿林皮山上阿林皮在依里斯部鐸利亞族之在鐸里斯也奉特爾斐市亞何路神社○即十二神之一結旁近諸市崇敬之後及希臘全

前一百一十一年

周平王元年四曆前八百四十二年

希臘始行阿林皮四年大祭

希臘始行阿林皮四年大祭

希臘始行阿林皮四年大祭

希臘始行阿林皮四年大祭

國稱曰同盟聯邦。特爾斐神宣國民信其威德而不疑。遂及政事必奉之勿違。強邦爲其盟主。祭天神於阿林皮。至是定每四年行大祭。以紀曆年。祭日演競走。競馬。跳盪角。抵等百戲。以賞勝者。國人歡洽。雖平生仇怨。置而不問。併天神尼米亞祭。亞何路神比斯祭。頗塞頓神伊西美祭。稱希臘四大祭。前九十三年。周平王五十八年。西曆前七百五十三年。羅慕路始建羅馬府。

義大利國東距亞得亞海西南斜入地中海爲半島。亞卑尼山脈綿亘如脊。低伯河發東北山中。南流入于海。間有野谷。若斷若續。氣候迥異。北方嚴冷。中央炎酷。南則近於海。較爲溫和。田土肥沃。穀麥昌茂。花木馨芳。風景清淑。西土羨爲福地。義大利本爲半島。南部稱漸通。全國分爲上義中義下義三部。上義有利格里。賀利亞。威尼斯。賀利亞。又分二部。中義有耶多利。拉畫。甲巴尼。三部。臨內海。翁不里。彼西南撒比。參紐。四部。臨亞得亞海。下義又號大希臘。東有亞布利。加拉不利。二部。西有盧加尼。不路適。二部。不路適之西有

西治里島。田極豐腴。多出穀果。其南有馬里他島。地多磐石。居民積土爲田。以耕。其西北有撒丁。哥耳塞牙。二大島。土壤廣莫。林莽間雜。民俗悍獷。披羊皮。挾利刃。隨在游牧。低伯河南岸有阿里亞族。分爲羅甸。荷西干。二族。羅甸族占西南平野。荷西干族居東南山地。又分至於南方甲巴尼。盧加尼。乃其土人東遷。蹙於亞布利。加拉不利。而希臘人拓不路適半島。及西治里島海岸。腓尼西亞人又拓西治里島西岸。羅慕路羅甸族人。亞巴隆牙王子也。勇武有才。圖增殖民人。建館於低伯河南巴拉的丘上。救濟貧困。名曰羅馬。其地隔河有耶多拉族。共通有無。遂爲要市。羅慕路乃創元老會議。以百人爲定員。然以國中乏女。掠奪撒巴尹族婦女。又奪其王女爲妃。撒巴尹族來戰。既而相和。羅慕路與撒巴尹王直斯答周共治羅馬。及答周殂。羅慕路獨王之。後王伐耶多拉族。威以斐埏那。宗教概同希臘。

按羅馬神史云。希臘羅馬王子耶尼亞。擊羅甸族。拉畫爲拉畫王。立以兄女勒亞。銀爾。非爲黑士。達神巫。不許嫁人。以圖絕。努米多。嗣既而勒亞與軍神。噶爾斯。結有孕。

學生二子長曰羅羅路次曰列羅士亞羅路之投二子於伯河有北羅米孔其人好士多路見而  
謂之取羅育之二子既長羅羅路一日有賊羅列羅士會遇其祖羅米多聞其山與羅羅路使羅米  
以復位兄弟築城於巴拉的各爭以名命其地羅羅路遂殺列羅  
士四已名呼其地為羅羅路是屬傳奇官未足深信姑存之

前九十二年周平王十九年四曆  
前七百五十二年 雅典定阿爾干任期為十年

先是阿爾干哥德落系任之不稱王號而其實不異王國人以為不便至是  
增阿爾干為九人定任期為十年其首班四人哥德落系任之餘地主家充  
之

前八十五年周平王二十六年四曆  
前七百四十五年 亞西里亞王滴臘比利第二立

王服屬巴比倫併伊蘭西部亞爾美尼亞及叙里亞叙里亞在地中海東岸  
東北距阿付臘底斯河南跨阿刺伯西南與腓尼西亞以色列猶太接黎巴  
嫩山在其北境又使腓尼西亞以色列猶太等朝貢

前八十年周平王三十一年四曆  
前七百四十年 斯巴爾達伐米西奈

米西奈接斯巴爾達西鐸利亞族之入米西奈土人倔強不服既而鐸利亞

族失勢依斯巴爾達於是斯巴爾達發兵攻之米西奈王亞利斯特摩守伊  
都墨堡禦之不能克遂降之斯巴爾達納其一部使其民輸貢賦

前七十年周平王四十一年四曆  
前七百三十年 依西阿比人取埃及

依西阿比將撒巴哥率兵侵埃及遂取之

前六十四年周平王四十七年四曆  
前七百二十四年 亞西里亞王破以色列擒其王

以色列國歐家絕國力漸衰納貢於亞西里亞至王何西亞舉兵圖脫羈絆  
亞西里亞王撒馬拿薩第四擊擒之遂定腓尼西亞叛亂

前六十二年周平王四十九年四曆  
前七百二十二年 亞西里亞王撒良立併以色列馬太

撒良為新朝始祖有雄才攻陷撒馬里亞府虜名族國人移之於本國及馬  
太以色列國亡撒良雄心未已馳驅戎馬定亞爾美尼巴比倫馬太之亂遂  
併馬太使阿刺伯埃及居伯羅等奉玉帛朝貢亞西里亞大興

前五十五年周平王五十四年四曆  
前七百十五年 羅馬王努馬本比流立

努馬本比流撒巴尹族也。羅慕路殂。按史云。羅慕路一日隨兵出城。風雨晦冥。失其所在。議官謂衆曰。王象雷電昇天。奉說基爾勞神祀之。遂空位一年。衆薦立之。王性溫厚。愛育黎元。初設律令。定祀典。建神廟。創社寺。境內大治。

前四十八年。周桓王十二年。西曆前七百零八年。斯巴爾達定以訶利任期為一年。建答連的市於義大利加拉不利州。

斯巴爾達以訶利威權太盛。脅制國王。於是選自貴族。定任期為一年。時斯巴爾達人移義大利者。建答連的市於加拉不利州。

前四十五年。周桓王十五年。西曆前七百零五年。亞西里亞王先拿基立立。至王時。武威稍衰。猶太王希西家與埃及合。拒朝貢。且嚴禁拜偶像。王大怒。遣兵圍耶路撒冷。軍中疾疫。無功而還。叙里亞亦離叛。

前二十九年。周莊王八年。西曆前六百八十九年。呂底亞王日熱斯篡立。呂底亞王統稱參獨尼土系。言出自日神裔。至王干道列。嬖臣日熱斯擅權。

與王妃謀弒王。篡立。初尙受亞西里亞驕靡。後漸隆盛。大拓疆域。自美西亞至黑勒斯奔海峽。

前二十五年。周莊王十二年。西曆前六百八十五年。齊侯小白桓公立。小白舉管仲為相。

前二十二年。周莊王十五年。西曆前六百八十三年。雅典改阿爾干任期。每歲選定。雅典阿爾干任期已長。漸有流弊。於是定為一年。專選於地主家任之。其首

班職如大統領。總攬國政。又管理諸族家長。次為司祭。以高僧任之。掌監督神典。赦免大辟。次為將軍。指揮軍陣。管理兵事。又斷外人訟。末班六人為判

官。裁決民訴。

前一十三年。周惠王四年。西曆前六百七十三年。羅馬王都路荷斯地留立。王努馬本比流子也。為人豪邁。與亞巴隆牙戰。亞巴請各擇勇士格鬪。以決

雌雄。出十利宙兄弟三人。羅馬亦以何拉周兄弟三人當之。六人健鬪。古利

宙兄弟殺何拉周二弟，何拉周伴走誘之，遂殺古利宙兄弟三人。亞巴降，亞巴總督墨都士不非周，嗾威以斐垓那人擊羅馬，約為內應，王擊破之，捕墨都士支解之，乃毀亞巴隆牙府，移其民於羅馬。

前一十二年 周惠王五年，四曆  
前六百七十二年 亞西里亞王以撒哈頓滅埃及

及以撒哈頓立平巴比倫之亂，復征服叙里亞腓尼西亞，居伯羅猶太，阿刺伯至是侵埃及，擊破其王撒巴哥子底拉哥，遂依西阿比人而取之分為二十縣，以埃及人為太守治之。亞細亞西部及阿弗利加東北全隸版圖，其人習天文，善測星度，西土推步之學，由此起。又巧築造，多營巨室，廣廈材皆用石，甄鑿運河於阿付臘底斯底格里斯兩河，以時蓄洩，防漲溢，有灌溉運輸之利，紀綱內張，威武外耀，工藝之精，商業之隆，以此時為盛。

前九年 周惠王八年，四曆  
前六百六十九年 亞義斯人敗斯巴爾達人，斯巴爾達人侵亞義斯，王非頓迎擊破之。

前八年 周惠王九年，四曆  
前六百六十八年 亞西里亞王以撒哈頓立

王定叙里亞北阿刺伯基利家之亂，又巴比倫太守叛，討平之，略挨蘭國，使呂底亞國朝貢。

前七年 周惠王十年，四曆  
前六百六十七年 我日本國神武帝發日向國東征。

我日本國天祖大日靈尊治高天原，是為天照大神，弟素盞鳴尊自出雲到新羅，復還居出雲，至大己貴尊，大神之孫瓊瓊杵尊平定下土，大己貴尊從之，其孫曰鷓鴣草尊不合尊，神武帝諱彥火火出見尊，其第四子也，生而明達意確如也，在日向國高千穗宮，西州久被王化，而東國未服從，長髓彥奉饒速日命據大和國，其他諸酋各自分疆，用相陵轢，帝謂其地足以恢弘大業，光宅天下，乃親帥舟師東征。

前二年 周惠王十五年，四曆  
前六百六十二年 帝平定大和國，奠都橿原。

帝率師入大和國，平定諸酋，攻破長髓彥，誅之，饒速日命降，奠都橿原，大營

宮殿

神武帝元年辛酉紀元一年周靈王十七年西曆前六百六十年帝即位於大和國樞原宮

正月朔帝即位於樞原宮號曰神日本磐余彥尊定功行賞置國造縣主作神時於鳥見山以祭皇祖天神

八年戊辰紀元八年周靈王二十四年西曆前六百五十三年埃及人參美底孤叛亞西里亞自立為王

參美底孤為灑的斯太守密與呂底亞王日藝斯結又藉希臘叙里亞腓尼西亞諸國力叛亞西里亞自立為埃及王建都於灑的斯灑的斯在下埃及尼羅河洲近地中海外人來往貿易大開參美底孤屯兵於要處護之設通事官以便交通及置希臘人工場於拿克拉的武人猜怨往々逃走依西阿

比按埃及人異說云時有十二王各雄長一方依西阿比人自塞統治委政於十二王參美底孤為其一遂逐十一王統領全國是埃及人譯為依西阿比人所征服從作是說也且據旋殿亦以為參美底孤所遣其殿之建既在千五百年前又傳會耳今不取

二十年庚辰紀元二十年周靈王十年西曆前六百四十一年羅馬王安固瑪爾周立

王努馬王之孫也都路殂衆推王立之王才兼文武討羅甸諸邦克之移其民於亞峴的郭為布勒卑平又修堡砦創囚獄架橋梁於低伯河開阿士底港於河口

二十一年辛巳紀元二十一年周靈王十一年西曆前六百四十年斯巴爾達取米西奈

斯巴爾達再攻米西奈米西奈將亞里斯迷尼驍勇守英拉城十一年至是斯巴爾達將智爾泰疴作歌鼓舞士氣遂拔之米西奈人多奔義大利餘編為奴隸

二十六年丙戌紀元二十六年周靈王十七年西曆前六百三十五年晉侯重耳文立

二十八年戊子紀元二十八年周靈王十九年西曆前六百三十三年馬太王法拉屋的及亞西里亞戰敗死子削蓋拿勒立

初馬太酋狄紹塞不服亞西里亞建耶巴達拿府漸有離叛之色及子法拉屋的代立遂叛自立稱王隸屬波斯征服大夏進擊亞西里亞軍敗死之子



削蓋拿勒嗣立波斯雖屬馬太亞把依迷尼亦自立稱王

二十九年己丑紀元二十九年周襄王二十九年西曆前六百三十二年北邊夷族侵亞西里亞

自馬太叛亞西里亞四疆多虞有西翅的金麥耳二族在多惱河亞速海間行國也以劫掠為業獷狃暴戾久為鄰患金麥耳為西翅的所攻南走入呂底亞奪撒狄城據之略小亞細亞西翅的又侵馬太轉西至猶太南窺埃及其勢猖獗橫行國中亞西里亞王不能平乃與馬太和假馬太呂底亞之力僅得攘之

三十二年壬辰紀元三十二年周襄王二十三年西曆前六百二十九年哥林多王百利安得立

方雅典之廢王而立長官也諸小國紛紛效之哥林多亦舉貴族為政有居布塞羅者圖更革之至子百利安得遂立為王王更張海軍拓地於各州又與隣邦相親

三十六年丙申紀元三十六年周襄王二十七年西曆前六百二十五年巴比倫叛亞西里亞

亞西里亞王以撒哈拔殂子撒拉固立自為西翅的族所侵國威頓衰其所置巴比倫太守拿保卜拉撒叛與馬太王削蓋拿勒結屢與亞西里亞王戰互有勝敗

三十七年丁酉紀元三十七年周襄王二十八年西曆前六百二十四年雅典阿爾干達拉固定法律

達拉固以才學稱衆公舉修刑書達拉固性嚴刻用法峻急不少貸時人號為血書

三十九年己亥紀元三十九年周襄王三十年西曆前六百二十二年猶太復國教

猶太王希西家殂子馬拿西立再崇異教拜偶像及約西亞立為西翅的族所攻略國內疲弊至是高僧耶利米盡力經營闡發國典復以天神教為國教

四十五年乙巳紀元四十五年周頃王三年西曆前六百十六年羅馬王達爾癸紐布利斯格立

達爾癸紐耶多利人也按一說以達爾癸紐為哥林多人與其婦達那基兒移羅馬安固王聞

其賢召使輔導諸子及安固殂國人推選爲王王建神廟於加比多利努陵  
上設地溝以疏瀦水置跑馬埒以競車馬又增元老議員爲三百人倍騎士  
數尋及撒比羅甸耶多利諸種戰皆克之

五十年辛亥

紀元五十一年周匡王三年西曆前六百十年

馬太王及呂底亞王和

馬太王削蓋拿勒侵呂底亞呂底亞王亞里遏的擊却之遂講和約以巴爾  
西江爲二國界以呂底亞王女妻馬太王太子亞士智芮隣好甚密於是亞  
里遏的征希西底亞巴弗拉莪尼加里亞略希臘所領西美爾拿哥羅翰諸  
市脅美列使會盟金寶充物盛興土木宮殿華麗富厚甲於諸隣當時陵墓  
今猶存於撒狄北方云

五十二年壬子

紀元五十二年周匡王四年西曆前六百零九年

埃及取叙里亞

埃及王尼古參美底孤之子也擊破猶太王約西亞於馬基特取叙里亞併  
之王有遠略承拉美塞王遺圖欲通運河於尼羅河紅海間鑿之而未能遂

又遣腓尼西亞人航巡亞弗利加

五十五年乙卯

紀元五十五年周定王元年西曆前六百零六年

馬太巴比倫攻亞西里亞滅之拿保卜拉

撒建巴比倫國稱王

馬太王削蓋拿勒及巴比倫王拿保卜拉撒圍尼尼微城二年遂陷之亞西  
里王亞撒拉固積珍寶縱火王宮自焚而殂亞西里亞國亡拿保卜拉撒併  
巴比倫及美索不達迷亞北部稱巴比倫王削蓋拿勒領底格里斯河東岸  
及亞爾美尼轉兵略伊蘭東部大擴版圖東至烏斯水稱亞細亞強國

五十六年丙辰

紀元五十六年周定王二年西曆前六百零五年

巴比倫王尼布甲尼撒立取叙里亞

巴比倫王拿保卜拉撒殂子尼布甲尼撒立敗埃及王尼古於阿付臘底斯  
河畔西爾色修取叙里亞征服猶太

六十一年辛酉

紀元六十一年周定王七年西曆前六百零七年

加爾達額拓地於近隣

自希臘人秉地中海利權腓尼西亞人漸不振於是加爾達額糾合族人以

抗希臘而自必卜東至列弗的略亞弗利加北岸與基勒尼人戰基勒尼希臘人所拓也後講和以列弗的東爲界

六十七年丁卯

紀元六十七年周定王十三年西曆前五百九十四年

雅典梭倫爲大統領更定法制

雅典行達拉固法十數年國人側足怨恫之聲日起有基倫者恃其舅墨格利斯王之援舉兵反阿爾干米格哥黎擊平之至是衆舉梭倫爲大統領梭倫者望族之英德望素著更定法制改鑄貨幣刪達拉固苛法酌情罪歸平允以資財多寡分齊民爲四等阿爾干九員自一等民選之改議院法置議員四百人自一等至三等大小法律先使之議定年滿三十者任之民會則通四等選之年滿二十者任之從其所議決以發號令舉官吏編騎步兵設艦隊又齊民均任之建法院選嘗任阿爾干者爲審官以定刑賞區畫精詳輿論翕然加惠黎民招徠商旅遠方之民歸之如市百工技業日精操奇贏多素封農夫積倉箱日益饒裕雅典遂爲大都會時稱曰素封政治時希臘

人材蔚起梭倫及雅典之欽拉哥林多之白里翁德密里多之推里司米地利之必得古斯巴羅達之企倫等文采風流卓越古今有七賢之目

七十五年乙亥

紀元七十五年周定王二十一年西曆前五百八十六年

巴比倫王尼布甲尼撒滅猶太腓尼西

亞大營巴比倫府

猶太爲巴比倫藩屬及王耶雅金立欲與埃及結以絕朝貢巴比倫王怒起大兵伐之陷耶路撒冷毀都市焚神廟屠戮民人脅其富豪遷之於巴比倫猶太國亡腓尼西亞亦屬巴比倫獨士羅府不屈巴比倫王乃移兵攻之遂降之初巴比倫府在阿付臘底斯河西岸王擴張規模以至東岸大興土木用大甃築二層方郭宮殿廟宇宏壯華麗樓閣縹緲夾持大江塔尖參差聳立蒼穹市街廣濶園林芳蒨積凡百四十餘方里稱爲宇內大觀之一又築城壁自阿付臘底斯河以達底格里斯河架橋梁通水槽構造之雄亙古無比云

綏靖帝元年庚辰

紀元八十年，周靈王五年，西曆前五百八十一年。

帝即位於大和國葛城高丘宮。

帝諱神淳名川耳尊神武帝第五子也容貌魁偉志尚沈毅最長武事神武

帝崩即位都葛城高丘宮。

四年癸未

紀元八十三年，周靈王八年，西曆前五百七十八年。

羅馬王塞爾彪都爾留立。

塞爾彪哥尼古倫人也為達爾癸紐王妃達那基兒所養及安固王諸子遣

刺客弒達爾癸紐王妃鎖宮門搜賊徒傳王遺命立塞爾彪為嗣王築羅馬

府外郭包七丘環石壁為羅甸盟主初羅馬有三級貴紳曰巴的黎支平民

曰布勒卑次為奴隸各結隣保有隣保會議選定國王於元老議員使王得

總執大權任免官吏但更法起軍必諮之於隣保會議又市民處死刑者得

訴國王請寬典有元老會議為國王顧問至王合貴族平民等級以有土多

寡定制設戶籍編軍團令從租稅兵役之事騎兵舊有六隊更增十二隊

以富豪充之步兵併工冶奏樂豫備共有百九十三隊自十七歲至六十歲

皆服兵役共屬國王直轄

十二年辛卯

紀元九十一年，周靈王二十一年，西曆前五百七十年。

埃及王亞馬支立

尼古王之孫亞布釐王勇敢好兵助猶太與巴比倫戰屢失和多損軍士軍

士怨怒弒之亞馬支出自卑族即王位結交於希臘尤密雇其兵略居伯羅

島又修灑的斯宮殿極其華美廣開貿易頓致富饒

十九年戊戌

紀元九十八年，周靈王十九年，西曆前五百六十三年。

呂底亞王架路索立

架路索亞里遏的王子也亞里遏的迫米列市使會盟王再尋之又征服希

臘所拓沿海諸市與希臘通往來漸繁梭倫亦來撒狄多所訓誡

二十二年辛丑

紀元百一年，周靈王二十二年，西曆前五百六十年。

庇士多辣安為雅典王尋被逐

時雅典貴紳恃富強而貧民得權者志氣驕盈漸成黨爭一日平原黨貴族

與之推里克羅格為長一日海岸黨商賈與之米格哥黎為長一日山岳黨

貧民與之庇士多辣安為長二黨務排斥貴紳梭倫護之不能得去至呂底

亞依架路索以明年卒於居伯羅島年八十餘庇士多辣安膽勇喜功名散財收人望遂自立為王貴族多去走外國其一部有赴答拉西者及山岳黨得志平原海岸二黨又合攻之明年遂逐庇士多辣安

二十四年癸卯

紀元百三年周靈王十四年四曆前五百五十八年

居魯士廢馬太王亞士智芮自立為波斯

國王馬太國亡

居魯士波斯人也英武過人汎愛得衆時馬太王亞士智芮暴虐國人側目居魯士因廢之代立稱波斯王仍都耶巴達拿修法度詰戎兵統轄伊蘭亞

爾美尼亞伽怕多家納亞士智芮女為妃置亞士智芮於宮中接之以禮

傳有以居魯士為亞士智芮女所生且亞士智芮感奇夢寐諸野等語蓋馬太人憐為他族所制想遠處既者今不取

三十二年辛亥

紀元一百一十一年周靈王二十二年四曆前五百五十九年

斯巴爾達霸於希臘

斯巴爾達除亞義斯亞加亞二部外盡併伯羅奔尼撒全州為各部盟主其俗儉嗇其人壯武兵制尤為盡善國勢益強

三十三年壬子

紀元一百一十二年周靈王二十三年四曆前五百四十九年

波斯王討擒呂底亞王呂底亞國亡

居魯士之廢馬太王也呂底亞王架路索以其姻親起兵伐波斯居魯士禦之境上陳兵大戰架路索趙趙將退居魯士乘勢攻之呂底亞軍大潰追北至撒狄陷之擒架路索呂底亞國亡居魯士待架路索以友禮撫其臣民秋毫無犯民大悅舉國皆降又併其沿海希臘地

按傳云居魯士將處架路索於火刑架路索臨之迫置檢倫之數有悔色

居魯士怪聞其故釋之架路索常信特爾靈神故有此事是希臘人為宣揚國人之知靈發揮神德之靈妙據道此說波斯人素崇敬明火不敢近污穢無行火刑之理今不取

安寧帝元年癸丑

紀元一百一十三年周靈王二十四年四曆前五百四十八年

帝即位

帝諱磯城津彥玉手看尊綏靖帝太子也綏靖帝崩帝即位明年遷都於河內國片鹽浮穴宮

六年戊午

紀元一百一十八年周景王二十四年四曆前五百四十三年

印度人瞿曇卒

瞿曇又稱悉達印度劫比羅伐率堵城釋迦族王子也印度人多黑面青唇以白布裹頭地本雕題種類貴人額塗日光花卉或以粉點面如星庶人額

上刺紋臂膀烙卦畫形皆雕題遺俗也男裸上體耳掛環下著圍裙女加  
上衣穿耳鼻掛金銀環臂脛俱帶釧鐲後世諸佛菩薩羅漢繪塑之像及僧  
服袈裟合掌膜拜仍其古俗人習技巧金漆雕鏤皆精絕其俗外尚柔和內  
懷私意似頑情實黠勇自以爲是故雖有婆羅門教猶不免暴虐苛酷之習  
瞿曇深厭之有矯正之志少出王宮入山林練修數歲一旦豁然有所覺悟  
別立教門巡行諸方以化導爲事謂之佛陀其教旨以慈悲忍辱爲主廢苛  
酷之制破種姓之等使人練心修行脫死生輪迴之苦界入寂滅無爲之妙  
境以臻道德之圓滿謂之涅槃以爲苦行及祭神非解脫之要道佛教之興  
風靡人心婆羅門教爲之衰後其教之廣布自前後印度西藏支那以及朝  
鮮日本信徒上四億人云瞿曇卒後其徒弟比丘五百人相會編纂經典曰  
第一次三藏結集至後有稍唱異說者比丘七百人再定訂之曰第二次結  
集當是時小部族割據四方而摩揭陀國漸盛在王舍城其王頻毘沙羅保

護佛教至子阿闍世築華氏城遷之征服隣國拓地於西北

佛滅之後衆徒紛  
多至五十餘載

相差至二千餘年未知確  
實今姑據原本爲是說

八年庚申

紀元一百二十年周景王四  
年西曆前五百四十一年

庇士多辣安再爲雅典王

庇士多辣安在外五年歸雅典然未得志復被逐漂泊他國十一年以是歲  
歸再爲王掌握政權內依梭倫憲法務得人心造軍艦勵文學技藝及商業  
修飾宮廟復舊觀外略昔西恩以特羅島爲附庸與近旁諸部結隣好然貴  
族多去國他徙者

十一年癸亥

紀元一百二十三年周景王  
七年西曆前五百三十八年

波斯滅巴比倫

波斯王居魯士兼波斯諸部方以取亂侮亡爲事巴比倫恬不爲備居魯士  
大舉來伐圍巴比倫城二年灌阿付臘底斯河陷之擒其王拿保尼斯及其  
太子伯沙撒巴比倫國亡腓尼西亞叙里亞皆屬波斯腓尼西亞西頓市復  
盛別建的里波利市

十二年甲子

紀元一百二十四年 周景王八年 西曆前五百三十七年

波斯王釋猶太民歸國

巴比倫之滅猶太裔遷其民數千人，虐使之殆七十年，猶太人恨之次骨，每食必祝其速亡。居魯士既興，猶太族日備壺漿待王師，居魯士陷巴比倫，乃釋其族，悉送還巴勒斯坦，猶太人大喜。

加爾達額略海島

加爾達額與希臘爭海權，降南西班牙撒丁島、哥耳塞牙。

十五年丁卯

紀元一百二十七年 周景王十一年 西曆前五百三十四年

羅馬王達爾癸虐蘇比爾伯立

達爾癸虐達爾癸紐之二子也，本名盧首士，為塞爾彪塔塞爾彪務攬民心，而貴紳不便之，盧首士性狠惡，與其妻謀弑塞爾彪而自立，驕傲暴虐，抑壓羅甸會盟，用詐謀奪略近隣，與同族構難，國人號曰蘇比爾伯驕暴之義也。

二十年壬申

紀元一百三十二年 周景王十六年 西曆前五百二十九年

波斯王居魯士殂，子岡庇斯立。

居魯士晚年事遠，略征東方諸族，九年于茲殂於陣，岡庇斯嗣立。

按居魯士之殂，或云伐宋。

據其國為其女主多美利所廢，或云伐特爾必克，其三日居魯士之事，若其生時，與說頗多，未知孰是。

二十二年甲戌

紀元一百三十四年 周景王十八年 西曆前五百二十七年

雅典王義比亞立

義比亞，庇士多辣安子也。庇士多辣安，代立性溫和，能修其政，大有人望。二十四年丙子，紀元一百三十七年 周景王二十一年 西曆前五百二十五年波斯滅埃及。

波斯王岡庇斯亦好遠略，討埃及，與其王麥美底孤第三戰於百路修，敗擒之，陷門非斯府，埃及國亡。

二十七年己卯

紀元一百三十九年 周景王二十三年 西曆前五百二十二年

波斯王岡庇斯殂於叙里亞。

岡庇斯既取埃及，將征依西阿比，阻沙漠輜重不屬，半途班師，至門非斯，觀府民盛飾神牛，巡城歡呼，謂喜我兵不利，屠神牛以食士卒，尋服基勒尼，又欲航海伐加爾達額，初腓尼西亞雖屬波斯，猶許其王自治，常起海軍從波斯征戰，至是又命其出師以加爾達額為腓尼西亞祖先所拓，不忍攻之，固辭。岡庇斯乃止，岡庇斯在埃及暴慢無道，虐使國人，國人大怨，還至叙里亞。

聞國亂大怒將歸征之蹶起跨鞍劍脫負創暴殂

二十八年庚辰

紀元一百四十年周景王二十四年四曆前五百二十一年

波斯人峩麻達僭立諸族誅之立大流

士為王稱波斯帝國

岡底斯之弟士墨底受封於東北為牧伯岡底斯心忌之陰殺之深祕不洩馬太僧有峩麻達者乘國人思亂利王在外詐稱士墨底僭立為王及岡底斯殂波斯望族七人謀誅之選於族中立大流士大流士希斯大士匹子也雄武有權略即位之初巴比倫叛大流士伐之城固不拔圍之閱二十月波將瑣比路伴降巴比倫納波斯兵陷之又馬太等亂皆討平之於是波斯版圖東至信度河西濱地中海北俯裏海及黑海南併埃及臨亞刺伯灣疆土之大前古所無

三十三年乙酉

紀元一百四十五年周敬王四十四曆前五百十六年

猶太再建神廟

猶太人歸復立故國首建神廟於耶路撒冷維持古教至是廟成

三十六年戊子

紀元一百四十八年周敬王七十四曆前五百十三年

波斯王征西翅的族

西翅的族嘗逐金麥耳族領其地往來於大拿以斯○今河伊斯的爾○今多兩河間逐水草遷徙不知耕作以游牧為業食馬肉飲馬乳乘馬駕車慄悍最長騎射無所統屬常事爭鬪大流士欲略西方率兵七十萬過海峽入歐洲渡伊斯的爾河侵西翅的境進達羅河○今河以乏糧米不得志而還答拉西國給爾孫州太守米力泰底謀要擊之米列州太守希爾周嘗為大流士所救欲報其德阻之是役惟取伊斯的爾河南答拉西馬基頓地又派兵略基勒尼

懿德帝元年辛卯

紀元一百五十一年周敬王五十四曆前五百十年

帝即位

帝諱大倭彥桓友尊安寧帝第二子也安寧帝崩即位明年遷都於大和國輕曲峽宮

雅典王義比亞走波斯



義比亞弟義巴爾孤掠取市人黑爾摩受妹黑爾摩受憤悲欲復民主政與其友亞里斯日敦殺義巴爾孤其家人殺黑爾摩受捕亞里斯日敦送諸義比亞義比亞殺亞里斯日敦及黑爾摩受妹遂深疾市人心稍離海岸黨首米格哥黎子哥黎底尼在外聞之與斯巴爾達將克勒阿麥尼通假其兵攻逐義比亞義比亞走至波斯依大流士

羅馬廢其王達爾癸虐蘇比爾伯

蘇比爾伯暴政日加國民離心其太子節士多亦譎黠淫虐同族達爾癸紐哥拉知那妻律勒思有德貌節士多污辱之律勒思慙憤伏劍而死於是蘇比爾伯甥不慮多聚衆示律勒思尸激之圍宮廢王併王族逐之王出奔耶多利

二年壬辰

紀元一百五十二年周敬王十一年四曆前五百九年

雅典哥黎底尼立共和政

哥黎底尼逐義比亞效梭倫憲法定共和政廢四等古俗混貴族細民設十

部新制以絕黨爭民會舊爲四百員增爲五百員每一部舉五十人又選一人爲部長更會期爲每歲十回他舉阿爾干選議員課租稅概仍舊法又行貝彈法民會不服大官所爲則群聚記其名於貝以彈劾人衆滿六千則逐諸外十年中此法者無損名譽無失財產凡有名人爲衆所妬忌者多中此法於是民權漸張

羅馬置公修爾

執政官

亦立共和政

羅馬始置公修爾官以貴族二人充之處理國務立共和政以不慮多及哥拉知那任之哥拉知那尋免以威勒留泊普里哥拉代之革隣保制設公民

會議選於軍團中有選舉公修爾可否法案之權分都市爲四區每四年

五檢戶籍以募軍團而隣保會議之權漸殺元老議員舊選於貴族中使平

民亦得與之然多以富豪騎士補之公民所議定元老裁可之國家若有緩急元老舉公修爾中一人爲總裁以當之其權準王公在任不得過六月又

置理財官二員監督國庫時貴紳少年有不喜共和者謀回復王政事露不  
盧多二子與焉不盧多盡捕誅之盧首士在耶多利煽威以達爾癸尼擊羅  
馬不盧多與亞倫士達爾癸尼戰於亞爾西林畔敗死亞倫士盧首士子也  
羅馬人聞不盧多死哀悼如喪父母羅克勒周代爲公修爾無何卒何拉周  
代之

三年癸巳

紀元一百五十三年周敬王十二年四曆前五百八年

耶多利伐羅馬

盧首士又說耶多利古路首王坡仙拿伐羅馬至低伯河何拉周撤河橋禦  
之不利退入城坡仙拿圍之城中食竭勇士模秀謀刺坡仙拿被虜坡仙拿  
熾炭火責之模秀從容出隻手於烈火上手焦爛神色不變坡仙拿惜其勇  
不殺羅馬割地請和聽之耶多利人進入羅甸羅甸遣其將亞利士特摩率  
希臘援兵逆擊大敗之逐耶多利人於低伯河西羅馬亦得撤和議復勢力  
雅典貴紳逐哥黎底尼尋復之

雅典貴紳亦不喜新政阿爾干伊撒格羅喉之誘斯巴爾達兵屬克勒阿麥  
尼者逐哥黎底尼市民素服哥黎底尼乃大起脅克勒阿麥尼約以斯巴爾  
達軍棄兵械退本國又使貴紳舉事者交付市民而刑之招哥黎底尼復爲  
阿爾干

五年乙未

紀元一百五十五年周敬王十四年四曆前五百六年

雅典略斯多爾達

斯巴爾達以克勒阿麥尼及特馬辣安二王爲總督率伯羅奔尼撒同盟軍  
將討雅典雅典聞之又起兵逆擊兩督不和哥林多兵先退雅典軍乃進破  
同盟軍略憂卑亞收其民四千戶財賑之於亞的加窮民

十一年辛丑

紀元一百六十一年周敬王二十年四曆前五百年

小亞細亞希臘人叛波斯

先是波斯王大流士遷都於蘇撒以耶巴達拿爲避暑宮新建離宮於百泄  
波里朝典宮制儼然改觀雕刻花文繪以金碧宏麗無比園林池沼尤極幽  
妙國王尊嚴民視之如對神祇又修築官道砥平髮直設郵驛自蘇撒達于

撒狄分全國爲二十州各置太守將軍其公解亦比美王宮改鑄貨幣制定  
稅法法律宗教各仍地方習俗鑿運河於埃及自尼羅河至紅海埃及王數  
世所經度至是始成初米列希爾周救大流士王受賞既而懷異圖大流士  
悟召之陽寵之命其婿阿利斯達寄刺代往希爾周恨之遣人勸阿利斯達  
說以阿尼族叛以阿尼人素勇悍自居魯士時受波斯羈絆常思脫之欣然  
從之遂叛

十三年癸卯

紀元一百六十三年周敬王二十二年西曆前四百九十八年

以阿尼人陷撒狄

雅典及憂卑亞人發兵援以阿尼族圍撒狄陷之焚其都市

十五年乙巳

紀元一百六十五年周敬王二十四年西曆前四百九十六年

羅馬破羅甸

羅馬雖人民稍得權利而貴族尙專橫平民不能得均一往往不平至如小  
民傭夫從軍徭役之苦苛稅嚴律之慘殆失生產於是貴族與平民相軋轢  
平民皆曰不蠲逋欠不能從軍物情恂恂元老議員諫之約待敵去蠲之總

裁卜士繆率軍與羅甸戰於勒其列湖畔大敗之盧首士走甲巴尼尋死

十七年丁未

紀元一百六十七年周敬王二十六年西曆前四百九十四年

羅馬置民長及警官

羅馬貴族猶虐待小民不已平民黨大憤聖山在距羅馬二里許地素豐饒  
相率將營新市於此別開一邑於是貴族黨亦有所顧慮盡蠲逋欠放奴婢  
選於平民新置民長警官各二人尋增爲五人民長有保護民利停止政令之權警  
官輔之掌巡視街衢警戒災害平民又設公會自議決其分內事

波斯大敗以阿尼族

波斯起陸軍征以阿尼族破之遣腓尼西尼海軍與雅典等艦隊戰於米列  
近海又大破之雅典憂卑亞退去以阿尼族力屈復降王乃命徙米列人於  
底格里斯河口誅希爾周等

十八年戊申

紀元一百六十八年周敬王二十七年西曆前四百九十三年

波斯伐希臘無功還雅典築卑勒烏斯

港

波斯王大流士敗以阿尼族又欲征服希臘遣其將麻脫牛統海陸軍討之  
進入歐洲陸軍略答拉西降馬基頓答拉西種族襲擊破之波斯軍逃還水  
師占答斯島至亞突斯岬遭颶風船艦多摧壞麻脫牛置戍兵於答拉西沿  
岸班師時雅典亞里斯知特地米多其利二人執政共俊傑有名地米多其  
利謀振作海軍議會可之乃築軍港於卑勒烏斯新造三桅艦三百隻一變  
制度雅典海軍自是振興

二十年庚戌

紀元一百七十年周敬王十九年西曆前四百九十一年

波斯遣使希臘希臘殺之

波斯恃其强大欲威嚇希臘諸邦遣使勸降加拉的益義拿諸島及希臘諸  
邦從之獨雅典及斯巴爾達不肯殺其使斯巴爾達王克勒阿麥尼迫益義  
拿人使送質於雅典

羅馬逐哥利荷拉那

羅馬黨爭未已貴紳不喜置民長欲托事廢之時歲饑馬爾修哥利荷拉那

與政府謀止糶穀以困平民使平民自廢民長以請糶穀平民公會怒之議  
逐哥利荷拉那哥利荷拉那奔窩爾西在拉嗾之擊羅馬羅馬窘遣其母  
妻說之母妻苦諫哥利荷拉那不得已收軍還

二十一年辛亥

紀元一百七十一年周敬王三十年西曆前四百九十年

波斯復伐希臘希臘擊敗之

波斯王大流士復遣其將大提士及甥亞答希爾侏率騎兵一萬步兵十萬  
駕三桅艦三百隻航於多島海伐希臘取拿克斯島毀其市上憂卑亞島圍  
耶列多里城陷之略其市民送之於蘇撒用亡王義比亞計上亞的加東岸  
進陣於馬拉敦雅典兵僅九千卜勒瑪耳保為總督亞里斯知特地米多其  
利等將之米力泰底亦自給爾孫來會構若要路以禦之請援於斯巴爾達  
斯巴爾達猶豫未出會布拉的兵一千來援九月十二日米力泰底率寡兵  
擊波斯軍於馬拉敦波斯大軍蔽野米力泰底張左右翼叱咤鏖戰呼聲撼  
天地波斯軍敗績爭船而遁還小亞細亞波斯水師將達亞的加岬襲雅典

城見其有備乃去義比亞歸到連那島而卒

二十五年乙卯

紀元一百七十五年周敬王三十四年四曆前四百八十六年

雅典米力泰底死於獄

米力泰底既奏大功國人妬其功者宣言曰彼得志必逞虐威是歲伐巴路斯島波斯軍被創敗還仇人爭起彈劾之坐贖罪家貧不能償下獄遂死

羅馬殺斯布留甲周

始甲周為公修爾使羅甸與羅馬同盟及三舉為公修爾定田地法欲割公田頒貧民及羅甸人其餘儲國庫以資貸貸而貴族及平民富豪者大怒割國土與羅甸人待其任滿處之死刑

二十六年丙辰

紀元一百七十六年周敬王三十五年四曆前四百八十五年

波斯王大流士殂子澤耳士立

二十八年戊午

紀元一百七十八年周敬王三十七年四曆前四百八十三年

雅典逐亞里斯知特

亞里斯知特與地米多其利性行各殊政略多不相容於是依貝彈法逐亞里斯知特地米多其利獨執政權

三十一年辛酉

紀元一百八十一年周敬王四十年四曆前四百八十年

波斯三伐希臘拔雅典府希臘人敗其

海軍於撒拉米灣波斯王引還

波斯王澤耳士欲繼父志必取希臘大發國內兵親統師次撒狄義比亞子百以壬多拉都斯巴爾達廢王特馬辣妥為嚮導役水兵及答拉西降卒鑿運河於亞突斯岬以避風潮又命腓尼西亞埃及工人架浮梁於黑勒斯奔海峽長二千丈建倉庫數十於小亞細亞及答拉西海岸以峙糧草是歲春王發撒狄取途美西亞至海峽渡軍七日夜不絕進至答拉西馬基頓兵凡九十萬其水師三桅艦凡二千五百隻別搭載器械船凡三千隻過亞突斯運河會之希臘大震德沙利白何西亞等諸部望風納款於是伯羅奔尼撒各部會哥林多推斯巴爾達為盟主合縱以禦之七月斯巴爾達王留尼達士率兵六千扼德爾摩比勒拒守德爾摩比勒負山臨海纒通一路險隘無比波斯軍大舉來攻不能拔會希臘軍有叛者告波斯軍以間道波斯軍乘

夜出其軍後留尼達士腹背受敵知不能克盡散國兵獨與麾下兵一千突波斯陣決死戰殺傷無算力竭死之後詩人施摩尼迪立碑頌其義烈時波斯水師提督亞貝麥尼率戰艦攻憂卑亞島北角亞的密修岬斯巴爾達提督歐利比亞特率戰艦二百八十隻與之戰雌雄未決聞德爾摩比勒之敗退入撒拉米灣伯羅奔尼撒軍築砦守地峽波斯王澤耳士長驅入希臘降羅哥黎鐸里西攻略特爾斐的士比亞布拉的等府逼雅典雅典孤立無援地米多其利棄都城移老弱於撒拉米益義拿等避寇壯者盡搭戰艦與斯巴爾達艦隊合澤耳士王入雅典焚其都市廟宇樓閣悉爲灰燼當是時希臘軍艦有五桅艦七隻三桅艦三百七十八隻歐利比亞特督之波斯戰艦一千二百隻蔽海而至衆恟懼九月二十日地米多其利設計遣一奴爲叛者告澤耳士曰希臘人旦夕將走不急擊則失之澤耳士悅命戰艦入撒拉米灣希臘人既無活路併力圍擊其船狹小運轉莫不如意會暴風起波濤

震蕩波斯戰艦飄揚相撞破壞沈沒希臘軍乘勢突進大破之波斯失其艦凡二百餘隻希臘僅四十隻耳亞利斯知特會在益義拿島聞國難倍道歸來又擊破波斯軍澤耳士王乃使其將麻脫牛率兵二十五萬駐戍德沙利退達黑勒斯奔途次糧食匱乏疾疫流行所失將卒頗多地米多其利謀尾擊之衆不從唯圍安多路西島而止雅典人卽歸故都復營市府

加爾達額寇西治里被敗

加爾達額將哈密加爾率軍入寇希臘屬部西治里島叙拉古王希羅等逆擊於非米拉殲之加爾達額出償金若干講和

三十二年壬戌

紀元一百八十二年周敬王四十四年西曆前四百七十九年

魯人孔丘卒

孔丘字仲尼魯昌平鄉陬邑人生於周靈王二十一年

我設精帶三十一

有聖德周游

四方返魯序書刪詩作春秋晚喜易序彖繫象說卦文言以詩書禮樂教弟子蓋三千焉身通六藝者七十有二人卒年七十三

波斯四伐希臘敗績希臘來伐小亞細亞

波斯將麻脫牛在德沙利因馬基頓王欲與雅典和雅典不聽會有波軍送澤耳王還者麻脫牛併其力乃與白阿西亞德沙利羅哥黎不西斯結北希同盟進入雅典壞其都府雅典兵寡不能拒再退保撒拉米伯羅奔尼撒聞之斯巴爾達將保撒尼率雅典布拉克的的西比亞兵凡十萬來援麻脫牛退白阿西亞守亞蘇波嶮而保撒尼逡巡不進獨使雅典兵當之九月麻脫牛來攻布拉克的保撒尼不得已禦戰雅典兵殊死戰大破之麻脫牛敗死波軍大潰時希臘水師斯巴爾達王列荷比達督之率雅典水軍將克麥的保艦隊警多島海攻小亞波斯水師提督瑪爾頓得疑小亞希人有二心欲拒之於撒母斯島衆不聽退據美啓爾市築壘守之希軍上陸攻之乘勝拔壘焚艦波軍大敗蓋與布拉克的之役同日云於是自撒母斯列斯保希阿諸島至小亞沿海諸港皆入希臘同盟伯羅奔尼撒兵引還獨雅典與以阿尼兵占

答拉西海峽扼之

雅典重建都府

波斯之來寇也希臘聯邦同心協力屢破大敵至是爭取波斯遺財頗有遺言雅典城扼海口操形勝且聚商舶擅利權斯巴爾達素忌之及雅典人欲復建都府而斯巴爾達阻撓之地米多其利不願之壯土木廣街市築堅壁環之以嚴防備更修卑勒烏斯爲要港

三十三年癸亥

紀元一百八十三年周敬王四十二年四曆前四百七十八年

雅典亞里斯知特革政

斯巴爾達將保撒尼既逐波斯軍統伯羅奔尼撒雅典小亞以阿尼艦隊威權日隆然性驕傲多所劫掠人心日乖雅典都督亞里斯知特與米力泰底子西門恭謙自抑大得輿望斯巴爾達以訶利執政召還保撒尼亞里斯知特執政權乃使國內四等之民皆得與政權自雅典城新建日益強盛希臘同盟之權自斯巴爾斯移於雅典別起海盟以特羅島亞何路神廟爲中心

聯邦皆納貢餉，雅典管理之。

孝昭帝元年丙寅紀元一百八十六年，周元王元年，西曆前四百七十五年。帝即位。

帝諱觀松彥，香殖稻尊，懿德帝子也。懿德帝崩，即位，遷都於大和國掖上池心宮。

六年辛未紀元一百九十一年，周元王六年，西曆前四百七十年。雅典逐地米多其利。

地米多其利與貴紳黨首西門不相好，各有其黨。至是地米多其利為西門黨所逐，奔亞義斯。

九年甲戌紀元一百九十四年，周貞定王二年，西曆前四百六十七年。雅典亞里斯知特斯巴西達保撒尼並卒。

亞里斯知特卒，西門獨執政權，頗有重望。保撒尼在斯巴爾達謀反，以訶利等將捕，禁錮之。保撒尼奔雅典，雅典不納，卒餓死。會地米多其利在亞義斯，以訶利疑其黨，保撒尼地米多其利奔波斯。

十一年丙子紀元一百九十六年，周貞定王四年，西曆前四百六十五年。波斯王澤耳士為其下所弑，亞答澤耳士

第一立

澤耳士王及其太子為親衛隊將亞答伴所弑，亞答澤耳士第一代立，澤耳士次子也，稱倫地麻那，誅亞答伴。

雅典破波斯軍於歐里麥頓。

西門執政，略答拉西地，討昔加拉島賊，定拿克斯。答斯諸島叛，是歲擊波斯海陸二軍於小亞南岸歐里麥頓，破之，遂取答拉西。給爾孫半島逐波斯人，移雅典民於其地。

十二年丁丑紀元一百九十七年，周貞定王五年，西曆前四百六十四年。斯巴爾達地震，叛奴作亂。

斯巴爾達地大震，壓死萬餘人。拉哥尼亞及爾西奈奴隸作亂，斯巴爾達疲弊，遣軍伐米西亞，而乞援雅典。西門聽之。

十四年己卯紀元一百九十九年，周貞定王七年，西曆前四百六十二年。埃及叛波斯。

埃及人奉伊拿羅士舉兵叛波斯，雅典援之。遣水帥與波斯戰於居伯羅島。



埃及太守米格必士擊叛徒平之時波斯漸不振各州屢有叛亂乃作傭兵以鎮之波斯之衰蓋兆於此

十五年庚辰

紀元二百年周貞定王八年四曆前四百六十一年

雅典與斯巴爾達構讐雅典比哩吉執政

雅典從斯巴爾達請送援軍而斯巴爾達懷疑又拒之雅典人慚憤與亞莪斯結以抗斯巴爾達而責西門舉平民黨首比哩吉代之比哩吉克參的波子也有賢名善辭令比哩吉發金賑窮民增議官判事兵士俸又革校倫法削法院權唯使司法律當是時雅典威力益盛比哩吉孜孜專力民治自卑勒烏斯港築長壁達都城以嚴防備益振海軍建亞塞那神廟於雅典府築以大理石彫刻極巧妙聯邦貢租嘗納於特羅島神廟者皆移納此於是聯邦如附庸答拉西以阿尼及群島皆以雅典為首府其所輸歲貢山積閭閻富庶又獎文學勵技藝使男子皆就學修文典音樂練筋骨史學哲學等名家彬彬輩出戲曲新起名篇往往傳世悲喜諸劇觀者莫不感興

十六年辛巳

紀元二百年周貞定王九年四曆前四百六十年

地米多其利卒

地米多其利在蘇撒依波斯王亞答澤耳土王予奉邑於小亞以圖希臘至是卒

十七年壬午

紀元二百年周貞定王十年四曆前四百五十九年

雅典逐西門

民黨得志依貝彈法逐西門

十八年癸未

紀元二百年周貞定王十一年四曆前四百五十八年

羅馬以沈申拿都為總裁

先是羅馬屢與近隣耶多利撒巴尹耶克亞諸族戰耶多利人滅哈毘族至是羅馬兵守亞基實山為耶克亞人所圍沈申拿都率兵赴援解重圍救之雅典援墨格拉與伯羅奔尼撒軍戰

墨格拉為哥林多益義拿厄多利諸部所迫乞援於雅典雅典為發兵與伯羅奔尼撒軍戰於亞莪斯被敗其水師與聯合軍戰破之遂圍益義拿

十九年甲申

紀元二百年周貞定王十二年四曆前四百五十七年

雅典及斯巴爾達戰

不西斯人攻鐸里亞。斯巴爾達與白阿西亞合，以其攝政尼哥麥特為將，進入中希，以援鐸里亞。不西斯人撤其軍，還雅典。驟起絕斯巴爾達軍歸路，尼哥麥特退入白阿西亞。與雅典軍戰於答拿格拉克之約和而還。

二十年乙酉

紀元二百零五年，周貞定王十三年，西曆前四百五十六年。

雅典伐白阿西亞。

雅典再起師伐白阿西亞，破其德巴兵。不西斯東羅哥黎部與雅典同盟，雅典革諸市貴紳政為民主政，益義拿降納軍艦輸貢租。雅典又掠拉哥尼海岸，移其米西奈人於雅典。

二十五年庚寅

紀元二百一十年，周貞定王十八年，西曆前四百五十一年。

羅馬置十法官。

羅馬兩黨軋轢愈盛，而民黨漸張。民長屋勒魯議置市尹，使公會選之。的連暢議設委員革法典，貴黨爭排之。既而謀調停，增民長五人為十人，頒丘陵於窮民，許營家居。約更編法典，遣人於雅典訪問梭倫憲法。於是廢公修爾及民長警官，更置十法官，改撰法典，銘之十銅盤置於市。

雅典與斯巴爾達約罷兵五年，西門復伐波斯。

比哩吉與西門和，召還之。西門乃謀與斯巴爾達約罷兵五年，復起水師，自率戰艦二百隻伐波斯，攻居伯羅島而病歿於陣。

二十六年辛卯

紀元二百一十一年，周貞定王十九年，西曆前四百五十年。

羅馬定十二銅盤法。

置十法官，期貴族平民共任之，而貴族獨當之。於是改選焉，舉平民二員為法官，更增新法二案。雖貴族亦不得不據新法，亦刻之銅盤，謂之十二銅盤法。

二十七年壬辰

紀元二百一十二年，周貞定王二十年，西曆前四百四十九年。

雅典水師破波斯軍。

西門既歿，其艦隊未退，攻居伯羅島。與波斯所遣腓尼西亞基利家水軍及陸兵戰，大克之。

羅馬廢十法官，復置公修爾及民長官。

十法官既制定法典，當辭其職而猶未退避。貴黨一派瓦勒流及何拉周等

迫元老議會勸其解任不果法官仍專任威權以亞彪革老士為首亞彪掠前民長某女勿吉尼於途其父追躡刺殺勿吉尼大呼求復警民黨見其漸擅恣侵法不服於是大憤起兵據聖山瓦勒流等調停盡罷法官處流亞彪及其黨阿彪斯自裁於獄因復置公修爾及民長以理國事

二十八年癸巳

紀元二百十三年周貞定王二十一年西曆前四百四十八年

羅馬新發法令

瓦勒流何拉周二人為公修爾議定法令其一公會決議與公民會議同其効其二復寬典法其三民長威嚴不可犯警官亦準之及增理財官二員為四人二人掌管國庫二人保管軍費臨戰督軍舊為公會所選舉使貴紳亦得與之然貴紳權力漸減後前四百二十一年許平民任民長民長列元老會議

二十九年甲午

紀元二百十四年周貞定王二十二年西曆前四百四十七年

白阿西亞等諸部革政

雅典人漸生侈心蔑視諸邦諸邦皆厭之自服白阿西亞諸市逐貴紳施民主政黨派紛起互爭雄長雅典遣軍援民黨貴紳被逐者還擊雅典軍破之

復貴紳政於是羅哥黎不西斯墨格拉諸邦亦復貴紳政脫雅典羈絆

三十年乙未

紀元二百十五年周貞定王二十三年西曆前四百四十六年

憂卑亞島叛雅典擊定之

憂卑亞島人叛雅典斯巴爾達將援之其王布列斯亞克拿率兵向雅典比哩吉啗王左右以利尼之直遣一軍於憂卑亞定之

三十一年丙申

紀元二百十六年周貞定王二十四年西曆前四百四十五年

雅典與斯巴爾達及波斯和

雅典與斯巴爾達構釁多年互有勝敗於是講和約三十年間弭兵伯羅奔尼撒聯邦及雅典聯邦各相自立雅典又遣使於蘇撒與波斯和約互相交通不交干戈撤雅典兵在居伯羅島者且不援埃及叛徒波斯亦許小亞以阿尼族自立且不出隻艦於多島海自是以阿尼人免波斯抑壓希臘模效亞細亞文化文學工藝商業等皆增進雅典尤受其利而斯巴爾達依然不改舊態

羅馬民長加那爾秀發法令

先是貴族不得與平民通婚加那爾秀欲貴族與民黨釋憾新發法令許其互相婚嫁使生子屬父系又議以平民任公修爾貴族不聽

三十二年丁酉紀元二百十七年周貞定王二十七年四曆前四百四十四年羅馬廢公修爾置軍務長官

加那爾秀盡力調和議廢公修爾新置軍務長官六人權同公修爾平民亦得任之又置司戶長官二人以貴族任之使每五年點檢戶籍兼監都人禮法振肅風紀督其租稅土木

四十五年庚戌紀元二百三十年周考王十四年四曆前四百三十一年雅典與伯羅奔尼撒構兵

雅典日極隆盛伯羅奔尼撒常嫉之會各西拉島人在希臘與哥林多人爭共拓地共乞援於雅典雅典助各西拉遣軍艦擊哥林多兵破之哥林多怒與墨格拉益義拿結訴雅典之罪於斯巴爾達斯巴爾達公會為雅典渝明令伯羅奔尼撒聯邦起兵墨格拉白阿西亞東羅哥黎不西斯等與之布拉克各西拉德沙利亞加爾拿諸部與雅典雅典有兵二萬九千三桅艦三百隻

德巴兵先攻布拉克的擊走之斯巴爾達王亞爾比達摩率聯合軍四萬侵亞的加雅典民盡入郭中據長壁以拒之而比哩吉自率雅典水師掠伯羅奔尼撒沿海略益義拿侵墨格拉

四十七年壬子紀元二百三十二年周考王十四年四曆前四百二十九年雅典大疫比哩吉卒

雅典與伯羅奔尼撒兵結不解雅典水師常得其利時會大疫死者相枕籍比哩吉亦染疾卒比哩吉未嘗任阿爾干以將軍總理國政兼監督財務其功業赫赫四方頌之平民黨首克勒恩起自皮工代為將軍

四十八年癸丑紀元二百三十三年周考王十五年四曆前四百二十八年斯巴爾達兵圍布拉克的

斯巴爾達兵進圍布拉克的時小亞海列斯保島美智列市叛雅典獨米智底市不應

四十九年甲寅紀元二百三十四年周考王十六年四曆前四百二十七年雅典定美智列斯巴爾達陷布拉克的

雅典水師攻列斯保島下美智列市克勒恩議處其民於斬行刑之日唯誅

貴紳黨壞其城市米智底市外地盡與亞的加民斯巴爾達兵陷布拉的虜其拒守者二百二十五人斬之

五十年乙卯紀元二百三十五年周考王十五年四曆前四百二十六年 雅典兵破依比爾士兵

伯羅奔尼撒兵援依比爾士雅典將特摩得尼率兵擊亞加爾拿破之

五十一年丙辰紀元二百三十六年周威烈王元年四曆前四百二十五年 雅典兵入米西奈

雅典水師將至西治里特摩得尼率之上米西奈據比羅廢墟伯羅奔尼撒將伯拉西達在土布克的里島爲所包圍進退無途斯巴爾達遣使於雅典請和克勒恩不聽自與特摩得尼合襲土布克的里島拔之虜二百九十餘人送之雅典爲質

五十二年丁巳紀元二百三十七年周威烈王二年四曆前四百二十四年 波斯王大流士第二立

亞答澤耳士王殂子澤耳士第二立未五旬其弟素克侍諾弑之尋其弟阿布士殺之自立是爲大流士第二稱訥答斯性昏惰后巴利撒知擅權國政

### 大亂

斯巴爾達兵略答拉西

雅典兵取希達拉島又自比羅擾拉哥尼亞別遣將亞基庇底攻白阿西亞爲白阿西亞人所敗亞基庇底名族子年少有俊才不能自檢束師事名賢索克拉的索克拉的常誠其輕率亞基謂立功成名惟在戰鬥至是索克拉的赴援亞基庇底僅以身免既而斯巴爾達將伯拉西達進入馬基頓答拉西謀略雅典地取安不波里據之雅典聯邦多叛應之雅典遣克勒恩於答拉西講和不聽

五十四年己未紀元二百三十九年周威烈王四年四曆前四百二十二年 雅典克勒恩戰死

克勒恩攻安不波里爲伯拉西達所破死之伯拉西達亦被創死

五十五年庚申紀元二百四十年周威烈王五年四曆前四百二十一年 雅典與伯羅奔尼撒和

克勒恩死貴紳黨首尼施亞代爲將軍與伯羅奔尼撒聯邦議和斯巴爾達

聽之約互返侵地換捕虜罷兵五十年

五十八年癸亥

紀元二百四十三年，周威烈王八年，西曆前四百十八年。

和議破斯巴爾達敗雅典軍

雅典與斯巴爾達和亞基庇底不喜說伯羅奔尼撒諸邦削斯巴爾達勢力

亞義斯哥林多諸邦應之叛斯巴爾達雅典援之和議破斯巴爾達與雅典

聯合軍戰於曼知尼在亞爾加的亞州大破之於是斯巴爾達霸業復成

六十一年丙寅

紀元二百四十六年，周威烈王十一年，西曆前四百十五年。

雅典伐叙拉古

叙拉古自擊退加爾達額後王希羅弟斐羅有雅量能治民平和日久為西

治里島中富邦列恩知市嫉之遣辯士曷爾基亞說雅典伐叙拉古叙拉古

人白爾摩克勒得諭諸市和解之既而列恩知人與耶吉士答市復共訴塞

利努及叙拉古於雅典尼施亞拒之亞基庇底固爭請伐衆從之發三桅艦

百三十餘隻兵三萬六千使亞基庇底尼施亞刺麻波將之擊取拿克蘇加

答那諸邑先是亞基庇底破毀神廟雅典議其罪召還到亞義斯聞所議罪

當棄市籍沒財產大憤轉途至斯波爾達誓報雅典

六十二年丁卯

紀元二百四十七年，周威烈王十二年，西曆前四百十四年。

雅典軍圍叙拉古

雅典軍入叙拉古圍其城刺麻波戰死

六十三年戊辰

紀元二百四十八年，周威烈王十三年，西曆前四百十三年。

斯巴爾達軍敗雅典軍於叙拉古雅典

置豫議官

雅典軍攻叙拉古不利時疾疫大行糧草缺乏軍大困憊會特摩得尼率七

十餘艦兵五千來援謀全軍還尼施亞不聽而亞基庇底在斯巴爾達說使

發兵援叙拉古九月破雅典軍於拉叙古港中殲之擒尼施亞特摩得尼等

斬之市投捕虜七十人於石窟多庾死當是時雅典窘窮奴隸逃走國庫匱

空貴紳黨復得志新置豫議官十人理財嚴兵以圖恢復而亞基庇底勸斯

巴爾達王抄掠亞的加煽雅典聯邦離叛又使小亞地屬希臘者附波斯約

小亞太守智撒布耳尼供軍費

六十四年己巳紀元二百四十九年周威烈王十四年西曆前四百一十二年 雅典水師敗伯羅奔尼撒水師於米列

雅典水師巡警小亞沿岸遭伯羅奔尼撒水師於米列擊破之將略米列為叙拉古水師所阻不果雅典增軍艦百隻泊撒母斯島時亞基底底為斯巴爾達所疎奔依小亞太守智撒布耳尼智撒布耳尼信任之又通雅典貴紳黨

六十五年庚午紀元二百五十年周威烈王十五年西曆前四百一十一年 雅典革政

雅典貴紳黨新建政府置議員四百人以貴紳任之民會限以五千公民兵士外悉廢廩給脅壓民黨臨以嚴刑與斯巴爾達約和而撒母斯水師不從之別推亞基底底為帥與小亞太守結反抗新政尋雅典民黨又起斥貴紳黨廢新政復舊制再開五百人會議使公民盡參與政權斯巴爾達淪小亞之約與希西底亞太守弗耳拿拔士結

六十六年辛未紀元二百五十一年周威烈王十六年西曆前四百一十年 亞基底底大破伯羅奔尼撒水師

亞基底底與伯羅奔尼撒水師提督閔達路戰於亞比脫在小亞破之又戰於

基知哥同復大破之閔達路敗死亞基底底統轄給爾孫半島屬雅典

六十七年壬申紀元二百五十二年周威烈王十七年西曆前四百零九年 亞基底底取比參修屬答拉四後稱若士但丁

斯巴爾達將克勒亞波有驍名固守比參修城亞基底底圍之遂陷之

六十八年癸酉紀元二百五十三年周威烈王十八年西曆前四百零八年 亞基底底為雅典統領

雅典人固器亞基底底及其屢建功大悅召還推為統領再率水師赴小亞

六十九年甲戌紀元二百五十四年周威烈王十九年西曆前四百零七年 斯巴爾達軍敗雅典軍亞基底底褫職

時斯巴爾達以利參特為總督波斯以大流王第二之二子居魯士為小亞太守居魯士素與斯巴爾達好相結乘亞基底底不在擊其副將安提阿克於耶弗索灣安提阿克懈警大為所敗雅典人歸罪亞基底底褫其職亞基底底奔給爾孫州尋卒

七十年乙亥紀元二百五十五年周威烈王二十年四曆前四百零六年 雅典水師敗斯巴爾達水師尋遭風覆沒

斯巴爾達水師圍雅典水師於美知列港雅典乃起全軍救之九月擊斯巴爾達軍於列斯保島邊破之既而颶風大作船艦覆沒者過半將士溺死者衆雅典咎其將帥處之死刑

七十一年丙子紀元二百五十六年周威烈王二十一年四曆前四百零五年 波斯王亞答澤耳士第二立

王大流士第二之長子也大流士第二殂嗣立稱佞蒙

利參特滅雅典水師

雅典水師既單弱斯巴爾達復以利參特任水師提督八月率伯羅奔尼撒艦隊擊之於耶古波大摩雅典水師狼狽奔潰利參特乘勢敗殲之雅典水師提督古農僅以數隻遁利參特收小亞沿岸及島嶼屬雅典者進迫卑勒烏斯港斯巴爾達亞義斯保撒尼亞兩王亦率陸軍圍雅典

叙拉古王日荷尼周立

加爾達額屢侵叙拉古王擊却之

七十二丁丑紀元二百五十七年周威烈王二十二年四曆前四百零四年 雅典降斯巴爾達

斯巴爾達軍水陸圍雅典雅典力竭遂降斯巴爾達人大肆劫掠要盟曰毀卑勒烏斯長壁備兵艦不得過十二隻餘皆收之乃悉改國法廢民主政選貴紳三十人爲統領委政權置鎮臺於雅典府三十人恃斯巴爾達力肆虐政雅典人苦之號曰三十虐官卒至互爭威權相共殺戮斯巴爾達再爲盟主而漸奢侈國力不能如舊

七十三年戊寅紀元二百五十八年周威烈王二十三年四曆前四百零三年 周命晉大夫魏斯趙籍韓虔爲諸侯

沓辣西淳路定雅典

三十虐官殘酷日甚有沓辣西淳路者被逐在外深惡其所爲糾黨起兵占據卑勒烏斯港斯巴爾達王保撒亞尼贊之和協公民遂殺三十虐官復民



政大赦

七十五年庚辰

紀元二百六十年周安王元年四曆前四百零一年

波斯王弟居魯士反王擊誅之

波斯王弟居魯士在小亞謀叛以希臘援軍一萬餘進迫巴比倫王逆擊之於古那撒居魯士與王單騎挑戰被殺希臘將色諾分率殘兵一萬取路於答拉西還世謂之一萬退軍

七十七年壬午

紀元二百六十二年周安王三年四曆前三百九十九年

雅典殺索克拉的

索克拉的雅典彫工子也有賢行時有詭辯派濫弄口舌索克惡之唱德即知之說以警醒世道人心色諾分布拉多等皆師之而多媚嫉者誣其不敬國神誘惑子弟訴之下獄毒殺時年七十後哲學者宗之

斯巴爾達伐波斯

波斯又以智撒布耳尼為小亞太守討希臘諸市屬居魯士者斯巴爾達聞之遣亞揭西勞等率軍援諸市進入小亞破波斯軍波斯責智撒布耳尼誅之

八十年乙酉

紀元二百六十五年周安王六年四曆前三百九十六年

羅馬陷威以

威以隔低伯河與羅馬接壤戶口亦匹常相仇視羅馬遣將弗流加美路攻之倔強弗拔圍之十年遂陷之羅馬既置軍長而憂國人不樂兵役議定祿制給兵士俸兵制粗定隣國聞之始懼加美路與民長不善民長劾其私敵貨逐之

八十一年丙戌

紀元二百六十六年周安王七年四曆前三百九十五年

德巴等與雅典合破斯巴爾達軍

斯巴爾達所置小亞太守巴爾摩士泰不協衆望波斯散金離間諸國於是德巴哥林多亞義斯與雅典結抗斯巴爾達斯巴爾達將利參特伐德巴戰於白阿西亞敗死

八十二年丁亥

紀元二百六十七年周安王八年四曆前三百九十四年

雅典及波斯水師破斯巴爾達水師

雅典水師提督古農率艦隊與波斯艦隊共擊斯巴爾達水師於古爾多逐

巴爾摩士泰侵拉哥尼亞海濱多所抄掠斯巴爾達召還亞揭西勞亞揭經  
答拉西馬基頓德沙利至白阿西亞與德巴諸軍戰破之得達斯巴爾達古  
農借金於波斯再築卑勒烏斯長壁與斯巴爾達兵結不解

孝安帝元年己丑紀元二百六十九年周安王十年西曆前三百九十二年帝即位

帝諱日本足彥國押人尊孝昭帝第二子也孝昭帝崩即位明年遷都於大  
和國室秋津島

三年辛卯紀元二百七十一年周安王十二年西曆前三百九十年魯盧人侵羅馬

魯盧族爲塞爾達種居上義大利強悍兇暴起兵入耶多利攻古路首古路  
首乞援於羅馬羅馬出兵救之魯盧兵轉侵羅馬羅馬拒之於亞黎河亞黎  
河者低伯之支流也大敗棄城走魯盧酋不連訥入羅馬府抄掠連日縱火  
焚之羅馬兵退保加比多命魯盧乘夜攻之星光爛然鵝群亂鳴滿留督兵  
死守魯盧圍之七月羅馬請和償軍費不連訥乃引兵而還羅馬人議遷府

威以時加美路召還爲將在城中以爲不可再營舊都

六年甲午紀元二百七十四年周安王十五年西曆前三百八十七年斯巴爾達與波斯和

斯巴爾達遣其水師提督安答西達於蘇撒講和小亞府市盡歸波斯希臘  
諸邦皆約獨立而希臘國勢頓衰

十四年壬寅紀元二百八十二年周安王二十三年西曆前三百七十九年德巴與斯巴爾達戰

雅典既復德巴亦成一大都德巴有兩黨一爲共和黨一爲貴族黨互相角  
爭會斯巴爾達將非比達率兵過白阿西亞貴族黨賴之非比達據加特美  
亞抗民黨民黨避難雅典至是推百路不達爲帥百路不達勇敢有氣與其  
友越巴美納達襲復德巴攻非比達斯巴爾達王克勒恩布路多及亞揭西  
勞來援不利棄加特美亞引還

十五年癸卯紀元二百八十三年周安王二十四年西曆前三百七十八年雅典復定海盟

斯巴爾達覬卑勒烏斯港雅典遂助德巴復與加拉的及小亞群島結海盟

以當斯巴爾達水師屢敗之既而與之和聯邦亦應之而德巴獨不肯聽

二十二年庚戌紀元二百九十年，周顯王五年，四曆前三百七十一年。德巴破斯巴爾達軍

斯巴爾達王克勒恩布路多率雅典及與國軍大舉侵德巴越巴美納達德巴名族忠勇有才幹國人皆服之嘗創陣法號斜陣於是將中軍督戰百路不達別提精兵會之號神威軍與斯巴爾達軍戰於流克多拉大破之斯巴爾達軍潰走德巴威名大顯

二十三年辛亥紀元二百九十一年，周顯王六年，四曆前三百七十年。德巴侵伯羅奔尼撒

亞爾加的叛斯巴爾達德巴援之越巴美納達百路不達二將率兵入伯羅奔尼撒大城麥加羅波里移四十邑民守之進擊拉哥尼復米西奈為獨立邦會雅典人援斯波爾達乃引兵而還明年復來擊昔西恩叛斯巴爾達助德巴尋三擊之與哥林多非西里亞盟

二十六年甲寅紀元二百九十四年，周顯王二年，四曆前三百六十七年。羅馬更定法律廢軍務總督復置公修

爾

羅馬貴紳猶弄威權平民黨爭訟未息里士紐及塞士達建議三條一曰寬減貧民負債二曰裁判私有公田三曰廢軍務長官復置公修爾二人其一入必選平民紳黨抗爭不決至是始可之明年舉塞士達始為公修爾擢任平民始於是然貴紳更置司法官執其權至數十年後平民有為提督者有為司戶者有為僧官者得參元老會議威權與貴族無異紳民一律相待又革兵制廢從財產以課兵賦之制更編軍列以應戰時尋戰勝所得公田漸多賦之平民以圖拓殖於是數百年來爭鬪始息人心協和國力日益旺盛叙拉古王日荷尼周第二立

二十九年丁巳紀元二百九十七年，周顯王五年，四曆前三百六十四年。德巴敗非勒亞

德巴既霸於希臘會德沙利圖獨立屢與非勒亞交兵德巴每援之於是百路不達自將征非勒亞克之而身亦陣歿

三十一年己未

紀元二百九十九年，周顯王七年，西曆前三百六十二年。

德巴敗斯巴爾達

越巴美納達率兵入伯羅奔尼撒，與其聯合軍及雅典兵戰於曼知尼，大破之。越巴美亦被數創而死。是役兩軍死傷甚多，希臘諸邦相議講和。唯斯巴爾達不肯米西奈獨立，故和不成。而德巴自是不復振。埃及叛波斯。

先是埃及人民屢起兵叛波斯，終不得志。至是又叛。斯巴爾達王亞揭西勞親率兵赴援之。其海軍則雅典人巴布流督之，尋亞揭西勞卒於歸途。

三十四年壬戌

紀元三百零二年，周顯王十年，西曆前三百五十九年。

波斯王阿克立

阿克立，侂蒙子也。嘗為希臘加尼州太守。侂蒙殂，即位，號阿答澤耳士第三。暴戾殘虐，多殺異父兄弟，大失衆心。

馬基頓王腓立立馬基頓大興

馬基頓國在希臘北，初甚微弱，屬希臘。得與阿林皮祭文物，專傲之。腓立亞

閔達王子也。嘗質於德巴。三年學兵法於越巴美納達。至是兄馬基頓王卒，

腓立即位。年二十三，雄武有權略，銳意軍備，自創陣法，號曰哈鑿斯。力訓練

兵卒攻隣邦北荷尼，壹黎里破之。有包括希臘之志。都伯拉

三十六年甲子

紀元三百零四年，周顯王十二年，西曆前三百五十七年。

馬基頓取安非波里

腓立經略答拉西沿海地，取安非波里，賺比多那，頗底地，與阿林答合，奪答拉西礦山，以抗雅典。時海盟諸市亦叛雅典，雅典擊之不利。

叙拉古直恩逐王日荷尼周第二

三十八年丙寅

紀元三百零六年，周顯王十四年，西曆前三百五十五年。

神聖軍起

初佛西亞人占領特爾斐神地，各邦議會責之，課罰金。佛西亞人不服，舉兵侵特爾斐神廟，掠其貨財。雅典斯巴爾達黨之，而德巴、羅哥黎、德沙利等執公議，擊佛西亞，謂之神聖軍。既而德沙利請援於馬基頓，腓立率軍來援，以雅典兵扼德爾摩比黎險，不得入。

四十五年癸酉紀元三百三十三年周顯王二十年四曆前三百四十六年馬基頓取阿林答

馬基頓威力漸張，雅典有特摩士的侏，獨察異日為禍，雄辯鼓舞諸邦，不肯屈下，世稱其說曰：非立皮克士及阿林答，叛馬基頓通雅典，特摩士的侏又說雅典使發援軍，未至，腓立討阿林答，陷之，取哈耳基地半島，毀諸邑，以其民為奴隸。

四十七年乙亥紀元三百三十五年周顯王二十三年四曆前三百四十六年雅典與馬基頓和

雅典議遣特摩士的侏等與馬基頓和，腓立乘之，踰德爾摩比黎入佛西亞，破之，毀其諸市，使輸租於特爾斐神廟，尋加希臘同盟，助亞莪斯、米西奈、抗斯巴爾達。

四十九年丁丑紀元三百三十七年周顯王二十五年四曆前三百四十四年哥林多取叙拉古

先是叙拉古王日疴尼周第二得歸國，至是哥林多遣其將的摩良來伐，王拒戰，敗績，的摩良擒之，檻送於哥林多，施民主政於叙拉古。

五十年戊辰

紀元三百十八年周顯王二十六年西曆前三百四十三年

羅馬與參尼的戰

先是羅馬四與魯盧人戰克之與羅甸諸市盟使服從征南部耶多利取之

與加爾達額結通商條約威力駸駸日彊漸圖南征參尼的種在羅馬東南

參紐山中勇悍好戰攻西地思奴破之侵掠甲巴尼平野二國乞援羅馬羅

馬發兵擊參尼的大將巴勒流哥爾多破之敖路山特修摸士又破之撒智

哥拉既而羅甸事起兩軍講和羅馬取甲補亞參尼的取的亞努共在甲巴尼州

五十三年辛巳

紀元三百二十一年周顯王二十九年西曆前三百四十年

雅典伐馬基頓

腓立既征服耶卑路德沙利又進至黑勒斯奔海岸拓地建腓立波里以逼

答拉西雅典屬地特摩士的侂又說諸邦使抗馬基頓於是麥加拉哥林多

憂卑亞亞加亞亞加爾拿尼等合縱推雅典爲盟主發兵擊馬基頓

五十五年癸未

紀元三百二十三年周顯王三十一年西曆前三百三十八年

羅馬併羅甸

初羅甸諸府求與羅馬諸府同權利欲其國人任公修爾一員元老議員半

數甲巴尼人亦應之。羅馬遣其將滿留マニウス。堙迦多カス率兵擊之。戰於威蘇維。羅馬軍法禁挺身格鬪。犯者處死。滿留少子犯禁。奮進斬敵將。滿留戮之以正軍法。特修摸土テラ。冒敵陣破之。戰死。世傳為雙美。尋滿留與羅甸甲巴尼軍戰於坦利花嗽タルク。大敗之。羅甸屈服。羅馬乃解其同盟。毀諸府。使其民為羅馬市民。或分其土地與羅馬貧民。又移羅馬民於其地為公民。他市亦使隸羅馬服軍役。於是拉畫一州全屬羅馬。

馬基頓破雅典諸軍

腓立欲制馭列國。散金以收人心。又陰嗾之。使生怨隙。各州義會陷其術中。責羅哥黎人侵特爾斐神地。委討伐之任於腓立。腓立即進兵。一舉陷羅哥黎。扼白阿西亞要路。希臘各州望風恐怖。獨特摩士的。促使雅典起水陸二軍。說德巴等連和以禦之。八月。腓立擊雅典。聯合諸軍於薛羅尼。戰正酣。腓立太子亞歷山德。別率一軍橫擊德巴。神威軍殲之。諸軍潰走。腓立惡德巴。

尤甚奪其白阿西亞置戍兵於加特米亞城與雅典會盟更進入伯羅奔尼撒割斯巴爾達地與之米西奈亞我斯亞爾加的亞諸邦廢各邦會議召列國會於哥林多自爲盟主議代波斯稱征波希臘大將軍使列國出兵徂征波斯王阿克瑟被弑子亞塞斯立

時埃及叛嬖臣霸哥斯埃及人也勸阿克瑟伐埃及取其珍寶而還又平腓尼西亞之亂見阿克瑟失衆心進鳩弑之及其諸子立季子亞塞斯親攝國政

五十七年乙酉

紀元三百二十五年周顯王三十三年西曆前三百三十六年

亞塞斯被弑哥猶曼那立

亞塞斯謀誅霸哥斯事泄迫王自殺立大流士訥答斯曾孫哥獨曼那爲王稱大流士第三哥獨曼那捕霸哥斯毒殺之

馬基頓王腓立被殺子亞歷山德嗣立

腓立衛兵包撒尼有怨於王將發征波之師置酒大會包撒尼得間殺之太



子亞歷山德嗣立年二十亞歷山德幼師名儒亞立斯得常慕古豪將亞基列之爲人才兼文武英略過人慨然有統一宇內之志脅希臘人推己爲盟主征波總督北渡多惱河征諸種族定其國境

五十八年丙戌

紀元三百二十六年周顯王三十四年四曆前三百三十五年

希臘叛亞歷山德擊平之

德巴雅典等乘亞歷山王北征叛王直還擊德巴破之毀諸市以其民爲奴隸惟存加特米亞城雅典聞風降

五十九年丁亥

紀元三百二十七年周顯王三十五年四曆前三百三十四年

馬基頓王亞歷山德征波斯

亞歷山王將伐波斯大徵諸邦兵命大臣安提巴的留守親率步騎三萬五千而發其將百爾寔各古利多加拉的路獨列米安提莪那等從之渡黑勒奔斯海峽至多來祭亞基列之墓五月波斯王哥獨曼那使其將綿農率兵數十萬來拒之於駕拉尼古河歷山王躍馬亂河諸軍繼進直突波斯軍大破之乘勝進過小亞使沿海諸市島嶼皆屬希臘者皆自立降加里亞呂家

旁非里亞轉途過庇雅尼弗呂家伽怕多家抵基利家答索斯遽得疾服名醫腓立藥卽痊

六十年戊子紀元三百二十八年周顯王三十六年四曆前三百三十三年亞歷山大破波斯王於伊斯撒

亞歷山王進至叙里亞波斯王哥獨曼那親率兵六十萬濟阿付臘底斯河

出馬基頓軍背後亞歷山王諜知之十一月回兵返基利家逆擊之於伊斯

撒府縱方陣衝敵軍勢如風雨殺傷太酷波斯軍奔潰死者十萬餘哥獨曼

那棄軍而走還蘇撒亞歷山王擄其母及妃女厚待之

六十一年己丑紀元三百二十九年周顯王三十七年四曆前三百三十二年亞歷山王取埃及

亞歷山王圖滅波斯水師過叙里亞至腓尼西亞新士羅府堅守不降王怒

環攻七月築大土塘蹙之城遂陷王斬戮數千人奴其人毀其市至巴勒斯

坦攻迦薩拔之進入埃及過百爾修達門非斯埃及人久苦波斯之虐歡呼  
迎之王略定全土不用寸兵遂經利米亞沙漠謁入必的安門神廟還抵尼

羅河口新建港市名曰亞歷山德黎亞規模廣大位置重要為地中海埔頭以代士羅後富庶繁華今猶為良港

六十二年庚寅

紀元三百三十年周顯王三十八年四曆前三百三十一年

亞歷山王陷蘇撒

亞歷山王還經巴勒斯坦叙利亞略大馬士革府渡阿付臘底斯河過美索不達迷亞又渡底格里士河十月波斯王哥獨曼那發大兵號百萬亞歷山王兵僅四萬七千大戰於亞拉伯波斯軍又敗哥獨曼那棄都城北奔亞歷山王所向披靡如行無人境入巴比倫尋陷蘇撒東行略百泄波里波斯王宮羅兵燹

六十三年辛卯

紀元三百三十一年周顯王三十九年四曆前三百三十年

波斯國亡

春亞歷山王追哥獨曼那北至馬太耶巴達拿哥獨曼那奔至巴爾的其太守別索叛殺之波斯國自居魯士創業至是二百六年而亡別索逃至拔克德里僭稱王亞歷山王聞之轉兵東行

斯馬爾達叛馬基頓擊平之

安提巴的留守馬基頓善理國事使王無內顧之虞斯巴爾達王亞藝士第三起兵叛安提巴的率軍入伯羅奔尼撒戰於麥加羅波里大破之亞藝士及其麾下五千人皆死之

六十四年壬辰

紀元三百三十二年周顯王四十年四曆前三百二十九年

亞歷山王入拔克德里

春亞歷山王入拔克德里別索逃渡烏許水王追之有捕獻者命磔殺之獲哥獨曼那屍送百泄波里厚葬之王北至藥殺水居索格日亞首府瑪羅干陀今羅麻里干討西翅的族又納拔克德里侯女羅嬰那為妃淹留其地怒其將古利多強諫殺之

六十七年乙未

紀元三百三十五年周顯王四十四年四曆前三百二十六年

亞歷山王征印度

亞歷山王欲益恢弘疆土進至信度河邊討其蠻民渡河達木若入印度是時印度各國爭雄相凌國力罷弊皆納款降附獨波路王出拒擊擒之尋復

其位厚遇之。

六十八年丙申。

紀元三百三十六年，周顯王十四年，四曆前三百二十五年。

亞歷山王班師至蘇撒。

亞歷山王將益深入印度，衆軍皆疲，不欲東。於是作祭壇十二，高與城樓齊，以傳功業於不朽。乃分軍爲二，水陸並返。克拉的羅先率一軍返法爾斯，水師提督呢爾固率海軍航印度洋向波斯灣。王親率大軍絕北羅吉沙漠，人馬罹疾斃者無算，遂達法爾斯尋還蘇撒。

六十九年丁酉。

紀元三百三十七年，周顯王十四年，四曆前三百二十四年。

亞歷山王革波斯政。

王夙有大志，欲使亞細亞風俗與希臘混化，建馬基頓波斯大帝國。其在拔克德里，既嫻亞細亞風習禮俗，又設亞歷山德府於數處，使希臘人守之。至是自納哥獨曼那長女及阿答澤耳士幼妹爲妃，使其將士娶波斯婦女。以波斯士卒編軍伍，采其儀式，使敬已如神。又建七十餘府，修道路，通貿易，使民俗日趨開明，人人得保自由，宗教亦從一變。然將士苦久役，往往有離叛。

者七月，馬基頓兵作亂，王擊之底格里士河邊，平之。乃厚賜老卒，使克勒的路送還之於馬基頓，命安提巴的別募壯兵補之。

七十年戊戌。

紀元三百三十八年，周顯王十六年，四曆前三百二十三年。

亞歷山王殂於巴比倫。

王檢阿付臘底斯河至巴比倫，將以爲帝都。六月，病熱及大漸，諸將遶床歎。歎王舉首謂之曰：予死之後，國中大亂，言畢而殂。年三十三，以香油塗屍，作大石棺，還葬於埃及之亞歷山德黎亞。王以勇武壓倒一世，志業未遂而殂，其事雖未無可議，而功德之及於後，亦大矣。王既殂，惟有異母弟，既而羅髮那生子，又稱亞歷山德，皆幼弱，不堪負荷。於是百爾寔恪管東部，安提巴的及克拉的路管西部，共攝國政，分諸將鎮各州。獨列米於埃及，安提我那於大弗呂家，旁非里亞，叙里亞，歐美侏於巴弗拉我尼，伽怕多，家里西馬，孤於答拉西，皆爲太守。

116  
4  
190

萬國史綱目卷之一終

